

皇明大政紀

皇明大政紀卷之十九

臣豐城雷禮謹輯

餘姚朱錦謹校

金谿閔師孔謹訂

丙寅正德元年正月朔

京師地動天鳴。

五星凌犯星斗晝見白虹貫日群災叠興併在一時。

命都御史楊一清總制陝西之邊軍務。

一清以寧夏花馬池係要害地虜數由以入率官屬沿邊巡視計處方畧上䟽極陳戰守之策修濬牆塹以固邊防增設衛所以壯邊兵經理寧夏以安內附。

都察院右都御史史琳卒于官。贈太子少保。

先是十二月。火星犯左執法而戴珊卒。琳以爲未也。及代掌院事。不踰月亦卒。後加太子太保。

加禮部尚書張昇爲太子太保。

孝皇賓天。及上嗣統。凡吉凶祭祀冊拜慶賚及儀物制度。皆昇任之。無違禮。

以右副都御史張泰巡撫陝西。

工部尚書曾鑑奏奉詔書裁革軍容鞍轡二局。添設管事內官。上不從。

令司禮監查正統天順年例來看。

南科給事中汪循疏請重詔書裁革中官。不報。

循言曾鑑題革內官。蓋奉行詔書也。陛下不蒙裁減。反令查正統天順事例。夫內官掌宮禁服御之需。未嘗干預朝廷之政。其載皇明祖訓昭昭可查也。陛下舍此不查。而令查正統天順年例。則誤矣。自夫添設中官。寵信大過。致有王振售奸。吉祥不軌。聖蹕蒙塵。幾危社稷。此可以爲鑒而不可以爲法也。

吏部侍郎王鏊請修復弘文館故事。講學親政。不報。

鏊因上遊逸。請便殿之側修復仁宗弘文館故事。妙選天下文學行藝著聞者七八人。更番入直內閣。大臣一人領之。而用楊溥故事。陛下萬幾有暇。時造館中。屏去法從。特霽天威。從容詢問。或講經。或讀史傳。或論

古今成敗或論民間疾苦如家人父子上有疑則必問下有見則必陳日改月化有不知其然而然者

二月上耕籍田

柳戚畹乞和買民田戶部尚書韓文力論止之

御用監太監王瑞以大婚禮缺儒士書篆營內旨令革退人役通送本監考校優劣吏部尚書馬文升堅執不從瑞以文升抗拒奏誣之

文升已奉旨考選而旨從中出文升方杜塞倖門不從瑞慚憤誣文升抗拒賴諸大臣力爲之辯其寃始白

掌大理寺事工部尚書楊守隨執法按中官李興以辟諸閹衛之

李興督造 孝宗陵寢。侵收柴銀。盜伐 皇陵松木。事下法司。興恃寵不服。扳新寧伯譚佑。工部侍郎李燧同罪。守隨乃叱之曰。柴銀是汝侵欺。陵木是汝盜伐。佑燧二人止坐不行。收正之罪耳。惡得比而同之。興語塞。遂按其辟。而內官益怨。

三月星隕如雨。

上幸太學。

大學士劉健等請 上御經筵。賜健等冠帶衣履。總制全陝都御史楊一清疏邊務四事。下部議之。曰。綏土人曰處額地。曰廣招募。曰溥賞賚。

撫治鄖陽都御史孫需議國家祈禱諸費。取諸香錢從之。

初祈禱諸費皆民出。需曰：山有香錢鉅萬，典守者私之，是不可取爲享神之用耶？令有司籍記悉貯均州。於是祈禱之費不擾于民。

以右副都御史洪鍾摠督漕運。

起巡撫江西都御史林俊上疏以疾辭，從之。

以熊繡爲右都御史總督兩廣軍務。

巡按直隸御史劉玉疏慎重大婚，劾太監吳中輕慢之罪，不報。

吏科都給事中安奎疏乞信老臣，將內批李鼎、吳一仲等仍遵詔旨罷職爲民事乃寢。

奎言：尚書馬文升遵明詔裁革冗濫七百餘員。今太監

王瑞題科書篆缺人。誤蒙選用。又將革去李鼎等六名。通令送考。雖該部堅執再三。而陛下終未俞允。且中間如雙線匠之類。亦得傳官。其於竈下養中。即將爛羊頭關內侯何殊。使李鼎等奸計得行。後即爲例。不知陛下何以處之。宜聽文升所執。若墮其奸計。則大臣垂首喪氣。直道何由得伸。非國家之利。

太僕寺卿儲瓘奏。邊方缺馬。止給本色。仍請差兵部郎中。同本寺少卿前去各邊。查勘原發銀買馬實數。以杜侵欺。下部知之。

瓘言。本寺馬匹。本備京營之用。不爲各邊之費。緣各邊各有行太僕寺苑馬寺所蓄馬匹。足備征調。其後馬政



廢弛一遇警急奏請紛然查宣府大同給銀買補不計其數邊方官軍因見京師銀馬易求不甚愛惜馬匹及至倒死不行賠償甚或侵欺買馬銀兩如都督汪鑑追贓罷官其弊難以盡言

四月提督團營兵部左侍郎許進觀闕具疏辭不允吏部尚書馬文升屢上疏乞致仕從之賜璽書褒美命有司月給米五石歲撥皂隸八名

文升素與劉大夏不協文升與許進劉宇皆河南人在弘治時文升嘗薦進提督團營宇總制宣大大夏見先帝因言宇之過宇幾不免戶部侍郎王儼兵部侍郎熊繡皆湖廣人儼與大夏姻親繡以廉著文升欲抑儼

等引進劉宇會兩廣缺總督都御史文升薦繡補之繡  
不樂于外請吏部辭之不久繡憾之與李東陽謀去文  
升以大夏代其任至是乃諷同鄉御史何天衢屢疏論  
之文升遂力求致仕章晚前後至二十一上乃允  
南京兵部尚書王軾乞致仕加太子太保從之  
以吏部右侍郎焦芳爲吏部尚書

司禮監太監李榮與芳同鄉爲芳內援故用之

改南京吏部尚書林瀚爲南京兵部尚書參贊機務

時冢宰缺人給事中丘俊御史石玠交章薦瀚學優才  
瞻臨事公平剛方素著廉介久聞宜居其位因改南兵  
五月商人譚景清附託壽寧侯奏討殘塩戶部尚書韓文

等舉正不報

景清既不肯奉詔還官。又不肯領回原價。挾制朝廷。搖撼官府。舉朝恨之。

清查湖陝河南戶口。刑部侍郎何鑑疏處置地方十事。下部議行之。

一曰請官給散戶田。二曰處置附籍人戶。三曰處置還鄉人戶。四曰查理軍匠奸弊。五曰嚴戶籍以革脫漏。六曰嚴版籍以清里甲。七曰嚴禁捕以靖地方。八曰專委任以總地方。九曰均田賦以安小民。十曰設衙門以控地方。復歸功於王瓊等一十二人。請量加旌擢。復陳途中所見軍民利病六事。請兌支以實京儲。處驛傳以祛

宿弊足兵食以備不虞。停夫役以賴民困。添佐職以備任用。均差操以障地方。奏禪新政。

內旨下兵部。大同隨征所開衝鋒破敵。三次當先。二項陞級數百餘人。

初兵部侍郎等官勘得原開係按狀不係對陣。且功無顯跡。名字不對。多寡不一。至是中官管旨乃一切陞之。視爵祿如糞土。

以右僉都御史王質巡撫貴州。

以王瓊爲右副都御史。總督鹽法。

內旨。叔南海子淨身人一千二百入內。

壽寧侯家人妄奏畿民侵占田地。出駕帖差校尉拿解繫。

獄。

時戚畹橫恣。中官附勢。祇憑妄奏。提解來京。鎮撫司行問情節。俱與原奏不同。仍解本處官司問理。株連負累。慘不可言。

清理鹽法。工部左侍郎張憲。以九年考滿。奏聞陞右都御史。仍董其事。

木匠兒子諸番掠樑新堡。巡撫都御史劉纓遣官討平之。捷聞。降獎勅勵。

前後俘斬千餘賊。懼皆投兵羅拜。誓不再犯。

以何鑑爲南京刑部尚書。

南京吏部左侍郎楊守陞乞休。進本部尚書致仕。

起南京兵部尚書丁憂服闋秦民悅于南京戶部

倭豎帛興齊玄盜空庫財事發寅緣出鎮科道累請追究  
不報

以彭澤爲真定知府

內旨差中官踏看皇莊

時行巡按查勘未報而差者繼出帶領人役騷擾地方  
人皆苦之

承運庫內官因各府支用銀兩累數百萬兩不給請自查  
算不報

六月辛酉雷震 郊壇禁門 太廟春獸 奉天殿鴟吻

大學士劉健李東陽謝遷上疏諫馳騁荒淫等事不聽

疏言。近視朝大遲。免朝大多。奏事漸晚。嬉遊漸廣。夫奢靡玩戲。非所以崇儉。彈射釣獵。非所以養仁。鷹犬狐兔。田野之物。不可育乎。朝廷弓矢甲冑。戰鬪之像。不可施于官禁。使正人不親。直言不聞。而此數者交襍于前。臣竊憂之。矧六月中旬。風雨飄蕩。雷霆怒震。殿鴟吻。太廟春獸。天壇樹木。禁門房柱。摧折燒燬。災異尤甚。惕然省悟。側身勵精。庶可以回天。憚人國家之福也。

以先師裔孫孔彥繩爲五經博士。

南京工部尚書李孟。賜乞致仕。從之。賜勅。給月廩歲祿。七月彗星見參井。掃太微垣。

太白經天。

南京兵部尚書林瀚等會陳弭災十一事。下該司知之。  
曰隆大孝以先天下。大畧謂先帝奄忽上賓。陛下  
親承付託之重。惟任大臣而不改乎。先帝之所倚用。  
立大政而不易乎。先帝之所貽謀黜遠近習而力體  
先帝之親賢遠佞。不假貴戚而力行。先帝之割私任  
公。戒飭邊備。常若先帝之不忘乎夷虜。節省財費。常  
若先帝之不忘乎生靈。事無巨細。無內外。惟倣先  
帝所已行者力行之。則大孝之實通乎上下矣。曰集群  
議以決大政。大畧謂陛下嗣大歷服之祔。繼體守成  
之時。夫何近來。旨從中出。內閣之所議擬者。徑行改易。  
所當誅馘者。悉不預聞。伏願念祖宗創業之至難。



陛下肩托之至重。延接大臣。講求治理。事無大小。悉從  
議擬。日召內閣。預聞施行。務得政令之大體。務協人心  
之至公。其次曰。改州治以奉陵寢。崇儉德以裕財用。省  
虛費以甦民困。增貢舉以進人才。修武備以禦寇盜。省  
匠役以甦民困。節工役以省財用。清吏役以革宿弊。清  
馬政以防欺蔽。大優容以廣言路。雖衆輪所長。而裁制  
多出瀚筆。言皆剴切無忌。士論翹之。然權姦自是側目  
矣。

內府各衙門營內官。乞留各營執事官軍。各內府軍匠。各  
倉軍斗。

初。前項劉大夏奏。准查赴團營操練。至是。佞倖利其私。

用。又乞留之。

巡撫應天等處副都御史艾璞奏重定論田加耗例從之。  
八月冊。皇后夏氏及德妃沈氏賢妃吳氏。

后父授都督同知。尋封慶陽伯。妃父並授錦衣衛千戶。  
尋進指揮僉事。並給莊田。

南京國子監祭酒章懋奏廟學損壞請修理不報。  
大學士劉健等上疏弊政乞賜罷黜。上慰留之。

疏言臣等遭逢先帝簡任內閣臨終顧命以陛下  
爲托即位詔下天下延頸想望太平旋致廢格不行變  
易殆盡以建言爲多言以幹事爲生事以執奏爲瀆擾  
以革弊爲紛更憂在民生國計則若罔聞知事干近幸

貴戚則率皆承順以一二人之私恩而壞定制以一二人之邪說而違公議臣等叨居重地徒擁虛銜或盲從中出畧不預聞或有所擬議徑行改易宋儒朱熹有曰一日立乎其位則一日業乎其官一日不得乎其官則一日不敢立乎其位若諉顧命之名而不盡輔導之實天下後世其謂臣何上諭待斟酌行

戶部累奏支用缺乏請發司鑄庫銅錢濟用不發

大角星搖動

起右副都御史林俊再撫江西

時各府地方盜賊烽起肆行劫掠從人望起俊再撫勅中有賊徒及窩主人等自首者許免罪有能互相首告

擒捕者一體賞勞。

九月兵部尚書劉大夏乞致仕章四上從之。

以許進爲兵部尚書仍兼提督團營。

內旨令饒州府燒造磁器起運來京用。

兵部尚書許進疏勸上勤學養心納之。

疏畧曰人主之心惟在所養以大舜之聖禹陳克艱惠

迪之謨益進遊逸淫樂之戒帝王誕膺景命罔不學

於古訓以克永世臣於經筵侍聽之餘仰瞻天表睿

智聰明矧儒臣進論諄切裨益弘多故臣以爲陛下

之心欲得所養惟經筵爲切務伏望時敏問學痛止

遊逸以古堯舜之君爲必可師以昔荒淫之王爲必當

戒則聖德日新災變自弭。

命陝巴子拜牙郎嗣忠順王。

以右僉都御史鄧璋巡撫遼東。

以右僉都御史車震巡撫宣府。

大學士劉健等上疏政令十失乞罷黜。上付諸司議之。

疏末云臣忠不足以格君才不足以濟世智窮力竭日

甚於前頃者臣等所陳奉有聖諭朕便處治至今事

有未行今奉聖諭云待斟酌行是必言無可采又使

之照舊輔導亦不過仍前失職而已先帝赫赫之靈

臨之在上豈欲以其冒輔導之虛名而蹈曠廢之實咎

於此哉臣等再三籌度夙夜靡寧陳力就列不能者止

聞之古人亦有明訓。與其身自壞之。不若讓之能者。用是備歷愚衷。再申前請。乞聖明俯垂洞察。諒臣等爲國之心。非由矯飾。正臣等失職之罪。特賜罷歸。亟還非常之才。俾任難爲之事。庶可以上回天變。下慰民心。承先帝付託之隆。保祖宗基業之重矣。

兵部尚書許進執奏。緝事官校王縉不當陞級。不報。

太監王岳奏稱。官校王縉等十餘人。緝事拿賊有功。得旨。官校陞一級。王縉象房管事。進執奏賞罰人主之大柄。當功則勸。浮功則懈。各邊官軍萬死得一首級。止陞一級。比之此輩。勞逸懸絕。此命一行。各邊聞之。孰不解體。

十月。霾霧四塞。

南京兵部尚書林瀚給事中牧相交論南京御用監牧養馬騾九千匹。役軍四千名。費芻粟鉅萬。下兵部議之。

兵部尚書許進條革弊政八事。不報。

其重者曰。遵文皇舊制。欲將內府役占軍士三萬三千名。革退迭操。并治中貴沮撓。成命之罪。曰。革冗員。欲將午門等門并九城門多餘內官。取回別用。毋令負綠添設。曰。甦困苦。欲復嘉蔬所舊制。革司苑局科剋軍士顧陪等弊。曰。重爵賞。欲裁革傳陞冒監軍職。

命大監劉瑾掌司禮監事。兼提督團營。丘聚提督督廠谷

大用提督西廠。張永等並司營務。收王岳李營。范亨徐智

下獄並發南京克淨軍。

上卽位之初。內臣馬永成及劉瑾等八人以青宮舊恩。日導上弓馬鷹犬歌舞角觥爲樂。舊內臣段敏黃備端慎斥不用。戶部尚書韓文每朝退對屬言。輒泣下。卽中李夢陽曰。公爲國大臣。義同休戚。徒泣何益。文曰。齋。

夢陽曰。公誠及此時。率諸大臣殊死爭。閣老以諸大臣爭持之更易爲力。事或可濟也。文毅然改容曰。是也。汝爲我草疏。卽事弗濟。吾年足死矣。夢陽具疏草文讀而芟之。曰。是不可文。文恐上不省。不可多。多恐覽弗竟。疏具。遂合九卿諸大臣上。人主以辨姦爲明。人臣以犯顏爲忠。臣等伏觀近來朝政日非。視朝漸晚。仰窺聖



客日漸清癯。皆太監馬永成谷大用張永羅祥魏彬劉瑾丘聚等置造巧僞。淫蕩上心。或擊毬走馬。或放鷹逐犬。或俳優雜劇。錯陳於前。或導萬乘之尊。與外人交易。狎暱嫖褻。無復禮體。日游不足。夜以繼之。勞耗精神。虧損至德。遂使天道失序。地氣靡寧。雷異星變。桃李秋花。考厥候占。咸非吉兆。切緣此等細人。惟知蠱惑君上。以行私。而不知皇天眷命。祖宗大業。皆在陛下。一身。今大婚雖畢。儲嗣未建。萬一遊宴損神。起居失節。雖將此輩。齏粉菹醢。何補於事。乞將馬永成等拿送法司。明正典刑。以潛銷禍亂之萌。先是科道交章請除群姦。上命司禮監至內閣傳諭。已悟。當痛加修改。所劾太監。

馬永成等始示涵容。劉健李東陽謝遷上言。此數人者。盡惑誘引。罪大惡極。得罪祖宗。非皇上所得而赦。再疏乞誅永成。上不允。於是健等以去就決之。各上疏求退。初閣議持言官章不下。諸閣業已窘。相對涕泣。會諸大臣疏又入。於是上遣司禮監八人齊詣閣議。一日而遣者三。健等卒持不下。內司禮監太監王岳者亦東宮舊臣。惡儕輩所爲。獨是閣議。明日召韓文等諸大臣。左順門太監李榮手諸大臣疏傳。上諭曰。諸先生言良是。無非愛君憂國之心。但各奴儕事上久。不忍卽置之法。幸少寬之。待上自處耳。衆皆惴惴莫對。惟韓文述群小熾非之罪。榮曰。疏備矣。上非不知。今第欲寬之。

耳。是日諸閣益窘。業自求安置南京。而閣議猶持不從。時王岳與司禮太監范亨、徐智亦助文等。密奏於上。言外朝多官論劾。不可不從。上不得已。允之。待明發詔捕劉瑾等下獄。瑾等趨至上前。環跪伏哭。以首觸地。訴岳等交通外臣。欲害奴輩。上爲之動。瑾因進曰。狗馬鷹犬。何損於萬幾。今左班官敢譁而無忌者。司禮監無人也有。則惟上所欲。而人不敢言矣。上怒。立命瑾等分據要地。各遣官校巡察。

劉瑾矯詔勒大學士劉健謝遷致仕。

先是瑾等嘗言內閣專執朝權。納賄行私。及言文官欺壓內臣武職之事。至形于戲劇。上久信之。至是遂准

命劉健謝遷致仕。惟獨留李東陽。蓋前閣議時。健嘗推案哭。遷亦嘗瑾等不休。惟李東陽不出一語。遂得獨留。勅舉朝共攻瑾等。欲誅之。閣議堅持。期在必克。兵部尚書許進謂同事者曰。此屬得陳斥足矣。若峻其事。恐有甘露之變。旣而果貽縉紳數年之禍。

劉瑾密遣人縊死太監王岳于途。

大學士李東陽乞致仕。不允。

東陽上言。臣等三人。責任同而獨留臣。將何辭以謝天下。疏屢上。竟不允。劉健謝遷旣瀕行。東陽祖餞。欷歔泣下。健正色曰。何用今日哭爲。使當時出一語。則與吾輩同去爾。東陽默無以應。

下戶科給事劉惟獄

惟上疏極陳時政其畧曰近權姦預政事勢異常聰明漸壅弊端日滋各處地方太監及各省鎮守內臣何必數數更換用新人固不若用舊人養饑虎固不若養飽虎蓋舊人猶或知事飽虎猶或易餒也又曰方今備邊無良策只增年例之銀兩理財無良謀賣及廣東之庫藏浙江既奏軍士無糧餉者已累數月山西又奏歲入不敷歲出者幾五十萬小民困苦而征歛益急帑藏窘乏而用度日奢今日之財用如此何所恃而不動心哉惟疏數千言言皆剴切

刑科給事中吳玗上疏乞留劉健謝遷下詔獄

以吏部尚書焦芳兼文淵閣大學士。吏部左侍郎王鏊兼翰林院學士，並內閣辦事。芳仍掌部事。

芳性險愎，始比尹旻父子。旻敗，由侍講學士謫桂陽州同知。復累遷至尚書。劉健與韓文謀除瑾黨，芳潛通於瑾。由是健等相繼斥罷。黨勢益熾，瑾遂引芳入閣，表裏爲姦。凡變紊成憲，桎梏臣工，杜塞言路，酷虐軍民，皆芳導之。暨克孝廟實錄總裁官，筆削任意。凡先正名卿，悉加醜詆。授檢討段昊以快其忿。

山西道御史劉玉、陳泊忽極論寵劉瑾佞倖小臣，棄逐顧命大臣。劉健謝遷乞將瑾等明正典刑，勉留健遷責成輔導，下獄黜爲民。

十一月逆瑾矯詔杖欽天監五官監候楊源于闕下。

源豐城人。憲使瑄之子。源于元年八月中。奏大角及心宿。中星動搖。天璣天璣夫權星不明。因勸上安居深宮。絕嬉戲。禁遊獵。罷弓馬。嚴覈令。毋輕出入。至是復奏言。十月末。占候連日。霾霧交作。爲衆邪之氣。陰冒於陽。臣欺於君。小人擅權。爲下叛上。引譬甚力。劉瑾怒。捏旨。楊源假天象妄言禍福。廷杖三十。釋之。

南京六科給事中戴銑等十三道御史薄彥徽等。上疏。點權閣。正國法。留保輔。托大臣。以安社稷。劉瑾大怒。捏旨。差官校逮繫錦衣衛獄。

劉瑾矯詔勒戶部尚書韓文落職閑住。

瑾恨文令人日伺其過。會有進納內府折銀者。內有假偽以文不能防姦。矯詔令落職閑住。瀕歸。復陰遣邏卒伺察于途。文乘一騾宿野店而去。戶科給事中徐昂上言。文率九卿上疏。忠憤所激。不應勒停。昂坐除名。爲民。於是文子高啓州知州。士聰刑部主事。士奇皆坐爲民。改兵部尚書許進于吏部。

時瑾與進同提督團營。故用之。

劉瑾矯詔勒左都御史張敷華致仕。以總督宣府軍務劉宇代之。

降戶部郎中李夢陽爲山西布政司經歷。罷之。

劉瑾知韓文等疏實夢陽贊成。故罷之。



以顧佐爲戶部尚書。

十二月進大學士李東陽少師兼太子太師吏部尚書。華蓋殿大學士焦芳太子大保武英殿大學士王鏊戶部尚書文淵閣大學士。

劉瑾矯詔勒掌大理寺工部尚書楊守隨致仕。以劉宇爲兵部尚書。

宇附焦芳結瑾故矯詔用之。

吏部尚書許進奏南京科道俱緊要衙門欲行南京部屬暫署科道以待各官問畢還職瑾怒捏旨罰進俸。

巡撫四川都御史劉纓疏橫梁蒲江等處廢關數苦諸省鈔掠請各立分司巡守從之。

劉瑾矯詔降南京兵部尚書林瀚爲浙江左叅政致仕。瑾素嫉瀚正直。值南京科道官言事被逮。獨往送。賕以俸金。且議上章直之。瑾聞。愈銜之。勒定科道招詞。連瀚同黨。乃矯詔降之。

南京副都御史陳壽獨疏申抹南京科道。劉瑾矯詔除名。杖兵部武庫司主事王守仁于闕下。謫貴州龍場驛丞。

瑾拿南京科道戴銑等下獄。人心洶洶。守仁言銑等以言責爲職。其言而善。自宜嘉納。如其未善。亦宜包容。以開忠讜之路。乃今赫然下令。逮事拘囚。在陛下之心。不過少示懲創。使其後日不敢輕率。妄有論列。非果有意怒絕之也。下民無知。妄生疑懼。在廷之臣。莫不以此

舉爲非宜。然而莫敢爲言者。豈其無憂國愛君之心哉。懼復以罪銑等者罪之。然自是而後。雖有上關宗社危疑不測之事。陛下孰從而聞之。陛下聰明超絕。苟念及此。寧不寒心。況今天時凍沍。萬一差去官校。督束過嚴。銑等在道。或至失所。遂填溝壑。使陛下有殺諫臣之名。其時追咎左右。莫有言者。則旣晚矣。伏願追收前旨。使銑等仍舊供職。擴大公無我之仁。明改過不吝之勇。則聖德昭布。人民胥悅。豈不休哉。瑾怒。矯詔杖五十。斃而復甦。

劉瑾擅權恣橫。收天下章奏于私宅。票旨批出。徑行之。上因瑾掌司禮監事。悉以天下章奏付瑾。剖斷初亦送

內閣後瑾自於私宅稟旨批出專用松江人張文冕者紀錄謄寫府部等衙門官稟公事日候其門自科道部屬以下皆行跪禮大小官公差出外及回京者朝見畢皆赴瑾宅見辭以爲常惟瑾自建白本則送內閣稟李東陽輩必爲溫旨有曰爾剛明正直爲國除弊等語選中書舍人李憲爲給事中。

憲與劉瑾同鄉瑾謂中書由進士出身者當與博士行人一體選科道遂以憲選科而中書得預科道自此始吏部左侍郎張元禎卒於官。

元禎癯然纖弱崖岸孤峭剛果之氣不可屈人有過能面折之爲文務奇崛每作不經人道語晚乃削異爲同。

黜奇爲平淡。造詣蓋益深矣。所交若陳布政選羅修撰  
倫。陳檢討獻章。皆以道學稱于時。入翰林未幾。卽歸臥  
林下不起。名高一時。天下士想望其風采。一旦起立華  
要。駸駸大用。或者始忌而毀焉。昧者弗察。紛然和之。亦  
不復究其初之何如也。

丁卯。正德二年正月朔。

劉瑾矯詔。逮尚寶司卿崔璿。按察司副使姚祥。主事張偉  
下獄。

劉瑾方張威勢。適璿冊封回。祥以御史陞出。偉以公差  
各馳驛乘輜。爲邏卒所緝。瑾拿下獄。璿祥枷於長安門。  
偉枷於張家灣。內閣部院大臣連上章乞宥。始釋獄。各

克邊衛軍

總制全陝軍務楊一清疏計處河套大事下部知之

其一修築定邊營迤東牆其二修復寧遠塞邊迤西北堡其三議設花馬池立寧夏後衛及興武衛營立千戶所其四防禦靈州土達改爲守禦千戶其五整飭肅州官軍其六增修黑山鎮遠關墩臺悉中機宜

劉瑾矯詔令吏兵二部凡進退文武官先於瑾處計議允行方許進本

內有今日陞職若謝禮微薄明日黜退或令致仕賄賂一通行議即起用

以都御史曹元巡撫陝西

元與劉瑾有親故用之。

閏正月劉瑾矯詔將南京科道戴銑薄彥徽等二十人并呂紳劉淮各廷杖三十發爲民。

以何鑑爲南京兵部尚書叅贊機務。

二月劉瑾矯詔諭都察院各道有奏章必先呈稟仍行南京都察院一體遵行。

以刑部郎中孫燧爲大理寺丞。

許進知燧持正故推用之。

劉瑾爲晉藩事惡禮部尚書張昇不附已勒令致仕。

召王瓊爲戶部右侍郎。

改南京吏部尚書李傑爲禮部尚書。

劉瑾矯詔令查盤天下軍民府庫科道將銀兩盡數解京。總督漕運副都御史王瓊疏請將掣去北直隸一總通州等九衛運糧軍餘照舊領運糧米五萬四千壹百三十四石京營操軍另以空閑衛所撥補。下部議之。御史王齊疏請早正種馬。下兵部議。准行之。

齊具論各處將種馬補足群數。每年歲取備用一群之內。各照人丁地畝議和朋約本色或折色大馬一匹。共取二萬五千匹。太僕寺所屬取七分。南京太僕寺所屬取三分。若解內有好駒。堪以備用。聽從本群人戶幫價起俵。折色者徵銀三十兩。其本色折色分數。本部仍臨時量酌奏請。設遇緊急。量爲增添。不拘此例。至今守之。



不失。

三月乙亥朔日食。

以講官詹事楊廷和爲南京戶部右侍郎。學士劉忠爲南京禮部右侍郎。

時上御經筵畢。終必獻規諫之語。是日廷和忠直講。旣罷。上謂劉瑾曰。經筵講官耳。何添出許多說。劉瑾與廷和皆舊東宮官。奏曰。二人當打發南京去。遂遷南部侍郎。時南部無缺。皆添注之。雖若遠之。實陞之也。忠謂廷和曰。此行須別瑾否。廷和曰。瑾所爲如此。再不可見之人。知必以我輩交瑾矣。忠然之。廷和密以錦幣辭瑾。瑾曰。劉先生不足我耶。自後瑾遂厚廷和而疎忠。

南京國子祭酒章懋以病歸。

懋任滿三載年踰七十以老病不能赴京給由懇辭不待報而歸復三疏始得請時逆瑾擅權名卿多遭斥辱而懋以先幾去矣。

劉瑾矯詔榜奸黨於朝堂頒示天下。

朕以幼冲嗣位惟賴廷臣輔弼其不逮豈意去歲奸臣王岳范亨徐智竊弄威福顛倒是非私與大學士劉健謝遷尚書韓文楊守隨張敷華林瀚郎中李夢陽主事王守仁王綸孫槃黃昭檢討劉瑞給事中楊禮敬陳震徐昂陶諧劉惟文洪呂紳任惠李光翰戴銑徐蕃牧相徐暹張良弼葛嵩趙士賢御史陳琳貢安甫史良佐曹

蘭主弘任諾李熙王蕃葛浩陸崑張鳴鳳蕭乾元姚學  
禮黃昭道蔣欽薄彥徽潘鏗王良臣趙祐何天衢徐鉉  
楊璋熊倬朱廷聲劉玉通相交通彼此穿鑿各反側不  
安因自陳休致其劾內有名者吏部查令致仕毋俟惡  
稔追悔難及

以韓重爲南京工部尚書。

刑部尚書閔珪請老加少保致仕。

劉瑾矯詔京官養病二年不赴部者革爲民未久者嚴限  
赴京聽選

瑾知科道等官忤已者養病避禍故嚴禁錮之

四月龍場驛丞王守仁佯投錢塘江遺詩于岸。

守仁被謫在途。瑾遣人隨偵將置之死。行至錢塘。度不免。遂乘夜佯投于江。冠履浮于水上。遺詩有百年臣子悲何極。夜夜濤聲泣子胥之句。浙江三司及杭守楊孟瑛皆信之。命漁人索尸不得。祭于江上。家人亦成服。守仁乃潛附商舟浮海至閩中。入武夷山。且將遠遁。或謂之曰。汝有親在。未免爲累。遂旋赴龍場。

劉瑾矯詔。令內閣于新差天下鎮守太監撰勅增入干預刑名諸政。

時新差天下鎮守太監奏。乞同巡撫都御史之任。干預刑名諸政。劉瑾從之。令內閣撰勅增入。由是中官挾勢剝民。憲臣不能禁矣。其最爲害者。河南鎮守廖堂剝取

民財輦送數十萬于京師。畢真者初差天津。取海鮮。後請勅自山東沿海達于蘇松浙江福建。所至括民財。凌辱官司。莫敢言者。

逮巡撫南畿右副都御史艾璞下獄。發海南爲民。

先是勲戚徐備因璞斷田于民。賂劉瑾別差官覆勘。差官承瑾風旨。乃悉以其田歸備。且劾璞前勘非是。瑾捏旨逮赴詔獄。訊之。璞不屈。曰。此實民田也。可滅天理乎。瑾怒。箠之幾死。數日方蘇。全家流徙海南萬州爲民。

劉瑾勒禮部尚書李傑致仕。

時晉府鎮國將軍表標賂劉瑾求封郡王。傑不與瑾。瑾銜之。竟以是去位。

以屠軟爲刑部尚書。

劉瑾等誣逮工科給事陶諧廷杖落職爲民。

諧在科前後疏上若戒逸遊以保治安。遠讒佞以一政令修人事以彌災異。停止不急工作以杜奸謀。停止差官賣鹽織造等疏皆直指群奸欺蔽之罪。無所顧慮。瑾等由是大憾之。

劉瑾以嚴刑劫人。不分輕重罪囚。并強竊盜賊私鹽逃軍鄰佑人等。一槩妄行枷號決打。永遠克軍。

原問官稍不順從。輒捏旨罰打降級。

劉瑾受寧王宸濠重賂。矯詔擅復護衛屯田。

江西寧府先犯不法事情。已經先朝革去護衛。改爲南

昌左衛濠懷不軌。差內官梁安。輦金銀二萬兩。通瑾。滕朧奏討。准改南昌左衛復爲護衛。又准與南昌河泊所一處侵奪民利。

五月。以高銓爲南京戶部尙書。

尋忤劉瑾令致仕。

吏部推總督兩廣右都御史熊繡掌南京都察院事。劉瑾矯詔令致仕。

繡在兵部。結怨中貴。至兩廣供應裁革。日惟廩給數升而已。劉瑾使人踪跡。其人回歎曰。熊廩給外無一毫過誤可指。吾且奈何。瑾竟不能害。二年取回南京掌院。繡捏旨令致仕。歸之日。雖紙筆藥餌。一無所取。

加兵部尚書閻仲字太子太保致仕。

加總督漕運副都御史洪鍾爲右都御史仍理漕運  
內監馬永成欲陞錦衣衛百戶邵琪劉瑾以不可爭止之  
以楊廷和爲南京戶部尚書劉忠爲南京禮部尚書  
大學士李東陽疏諫內苑御船獵獸上褒答之

疏云今歲自端陽後金鼓炮火聲徹都邑廐牧廝役紛  
克禁廷大臣畏忌不敢言小臣震懾不敢諫不知祖宗  
分職設官朝廷糜祿養士將焉用之昔漢司馬相如諫  
擊熊豕以爲軼群之獸與不及還轅人不暇施巧非天  
子所宜近薛廣德諫御樓船以爲乘船危從橋安聖主  
不乘危伏望鑒古道以端好尚視朝加早則炎暑不侵



進膳有時則元氣日盛

六月命刑部右侍郎王鑑之往鞫河南徽世子所奏庄田稱旨陞俸一級。

世子累奏庄田不結鑑之判世子田與民田各明白上  
下帖然。

劉瑾妄議革天下按察司提學官以吏部尚書許進執奏不可止之。

進謂提學作養人才之本竟得留。右都御史陳鳳梧挽詩曰。乞留提學當年疏。猶有餘光照杏壇。復註其詩曰。某時承泛湖廣實蒙其惠云。

以劉機爲禮部尚書。

以劉宇爲兵部尚書。

劉瑾矯詔令南京吏部尚書王華致仕。

瑾恨守仁。故移怒于華。

劉瑾違例報私忿。將弘治元年以後守正職官封贈恩典一槩行令追奪。

七月。以張鵬爲南京都察院右都御史。

以李燧爲工部尚書。

以右都御史陳金總督兩廣軍務。

八月。黃河清。

慶雲見翼軫分野。

世宗生于興邸。

加焦芳少傅兼太子太傅謹身殿大學士王鏊少傅兼太子太傅武英殿大學士

追贈故工部尚書謝一夔謚文莊錫之誥命

起前吏部尚書屠滂掌都察院事

罷總制陝西三邊都御史楊一清

先是一清巡邊因上疏陳戰守之策且言河套即古朔方地唐張仁愿築三受降城自是無寇乞修濬牆塹以固邊防增設衛所以壯邊兵奏上報可一清遂興築邊牆尅期完功會劉瑾憾一清遂乞休工亦停罷

劉瑾矯詔杖欽天監五官監候楊源謫戍肅州卒于懷慶源奏自正德二年以來一向占候得火星入太微垣帝

座之前。或東或西。往來不一。勸上思患預防。意在劉瑾也。瑾大怒。將源疏留中不出。召源面斥之曰。你何等官。要學做忠臣。遂捏旨拿送錦衣衛。着實打三十棍。發肅州衛永遠充軍。差官押送至河南河陽驛。因傷重死焉。妻杜氏斬蘆荻覆尸。堊于驛後。源父御史瑋以劾曹石謫戍嶺外。猶幸生還。源累疏獻忠。不愧其父。而身遂不免朝野悲之。

劉瑾擅改納粟監生姪婿曹謐爲千戶。

順天府奏鄉試取中式舉人張行甫等一百三十五名。  
主考翰林院學士劉春侍講學士吳儼。

應天府奏鄉試取中式舉人吳仕等一百三十五名。

王考諭德傅珪侍講顧清。

九月，柳慶徭獐常朝宣等構亂。總督兩廣都御史陳金命官兵討平之，以功陞左都御史，仍舊任。

劉瑾諫上令人包納錢糧，枷攬納戶部門外。

瑾性極貪酷，而假仁義。太監王璫於御馬監建新宅，誘上居之。因奏令攬納戶數人，專一包納京庫糧草，所得利進于內。璫自爲旨送戶部，尚書顧佐白于瑾，瑾大怒，入言安有天子令人包納錢糧之理。上以爲不知，瑾遂枷攬納戶于戶部門外，皆死。

調邊方知府李遠于杭州。

郎中李遠因公忤持衡者，出爲邊方知府。吏部尚書許

進察其枉調入杭州。

十月賜皇親沈傳吳讓靜海縣莊田六千頃。

讓妻厲氏奏稱河間靜海莊田一處原係河淤退灘田土乞比照皇親夏儒事例給與管業蓋姦民李良等捏稱投獻也事下戶部查河間莊田冊並無靜海河淤退灘地及差官勘前地頃畝數多見有軍民管業難便定擬覆奏上不從卒賜二家爲莊田永業。

以南京戶部尚書楊廷和爲戶部尚書兼文淵閣大學士入閣辦事。

起張綵復爲文選郎中。

綵先爲文選時焦芳爲侍郎相得至是芳在內閣令綵

說是署郎中。薦于瑾以爲綵乃公之鄉里極有才。可用爲文選郎中。會劉永陞通政。尚書許進已議調驗封郎中。石確于文選疏已入。而綵適到。瑾欲復用綵。逼進追回用石確疏。以綵易之。進雖用綵而心甚銜之。以張縉爲南京戶部尚書。瑾矯詔逮之。令致仕。

十一月。劉瑾矯詔革天下巡撫。

瑾以天下巡撫官非舊制。票旨將各省巡撫都御史俱取回。惟邊方及漕運都御史仍舊。其餘衙門添設官員。悉裁革不用。

總督兩廣左都御史陳金奏岑猛以功贖罪。免遷。從之。仍命猛爲田州府同知。

初猛與岑峻仇殺都御史潘蕃討平之。降猛爲福建平海衛千戶。改流官知府守之。始以夷民編戶。諸酋多不便。因相構亂。而猛亦擁兵自固。寅緣奏辯。劉瑾力主之。故陳金有此奏。使立功贖罪。尋復指揮同知。逮各邊巡撫都御史及管糧郎中下獄。

劉瑾素知邊方召商中納積弊。因戶部奏差科道官三年一次查盤。回奏內有糧粗糲草泥瀾者。票旨逮繫各巡撫管糧官下獄。旣而鎖扭差人押至所任地方。加倍賠償。凡商人納過糧草拖欠價銀。皆沒官不給。由是商賈困弊。邊儲愈乏。

劉瑾矯詔裁革天下按察司兵備官。



十二月改劉忠爲南京吏部尚書

逮順天府丞趙璜下詔獄黜爲民

璜任濟南知府裁抑鎮守中貴故瑾逮之

以貲宏爲禮部右侍郎

劉瑾誣巡撫湖廣都御史劉纓擅闕荆楚道路不先奏請詔獄賴廷臣論林釋之

劉瑾羅織浙江按察司副使邊憲以覈遼東邊儲不清罰米二千石

瑾銜憲按宣天忤其意故追罰之

逮南京刑部侍郎劉憲以巡撫寧夏事下獄卒

雲南屬夷酋阿本構亂巡撫都御史吳文度率兵討平之

賜勅獎諭。

加刑部尚書屠勲太子太保致仕。

戊辰正德三年正月朔。

吏部尚書許進等會同都察院考察天下諸司不職官。幾二千名。

劉瑾矯詔查考察爲民。荆州府知府考語來看。尚書許進抗論止之。

荆州知府貪暴無比。監司考語不敢署其惡。進奏爲民知府復賄瑾中批留用。且命查其考語來看。僚屬悉懼。進乃查奏諸司考語。而自署其後曰。上司畏其挾制。而考語欺天下。民被其殘虐。而怨聲動地。知府後卒廢棄。

劉瑾令朝覲官每布政司送銀二萬兩。

各官無措。皆借于京師富家。及回任。括民財倍償之。

逮李夢陽下錦衣衛獄。以修撰康海申。求釋之。

夢陽代韓文草疏。瑾已謫出之。猶不快。前忿羅以他事。械至京。遂下獄。將置之死。時翰林修撰康海與夢陽同有才名。各自負不相下。瑾慕海。嘗欲招至門下。而海不往。瑾恒先施。必欲其一至。海每矜亡答之。竟不一入其門。至是夢陽所親有左姓者。詣獄謂夢陽曰。子殆無生路矣。唯康子可以解之。夢陽曰。吾與康子素不相能。今臨死生之際。乃始托之。獨不愧于心乎。吾寧死矣。左曰。不謂李子而爲匹夫之諒也。強之再三。以片紙請書數

字夢陽乃援筆曰。對山來我。唯對山爲能來我。餘無一言。對山者。海別號也。左持書詣海。海曰。是誠在我。我豈敢吝惡人之見而不爲良友一辟咎也。遂詣瑾。瑾焚香迎海。延置上座。海不少遜。瑾曰。今日有何好風。吹得先生來也。命左右設席。海曰。吾有言告公。公如聽吾言。當爲公留。不然。吾且去矣。瑾曰。云何。海曰。昔唐明皇任高力士。寵冠群臣。且爲李白脫靴。公能之乎。瑾曰。瑾即請爲先生脫之。海曰。不然。今李夢陽高於李白數倍。而海固萬不及一者也。下獄而公不爲之援。奈何欲爲白等脫靴哉。即奮衣起。瑾固塞而止之。曰。此朝廷事。今聞命。即當幹旋。海解帶與之痛飲。天明始別。夢陽始得釋歸。

而海自是與瑾往復。遂惟清議矣。

二月。以江瀾爲禮部尚書。

召王鑑之爲刑部尚書。

吏科都給事中王承裕上疏言時政。罰米三百石輸邊。

劉瑾奏太監丘聚交通外臣。調南京孝陵太監。

命少傅大學士王鏊掌詹事府。吏部尚書梁儲主考會試。賜宴于禮部。

撤棘取中式舉人邵銳等三百五十人。

養病南京國子祭酒章懋准致仕。

起前戶部尚書周經于禮部。經乞致仕。從之。

起前都御史雍泰提督南京操江。

先是馬文升劉大夏交薦之。及給事中潘鐸等復疏。泰有敢死之節。克亂之才。許進薦于瑾。瑾以同鄉故起之。鄉人論泰謝瑾。泰曰。進退在天。若柰我何。

劉瑾矯詔逮陶諧。謫戍肅州衛。

瑾憾諧未已。以在科時嘗巡視十庫。遂駕言缺乏布疋。差人解詣京。下之詔獄。捫摭百端。誓死不爲動。乃復杖謫之。

三月。以張綏爲都察院左僉都御史。

劉瑾矯詔文致致仕尚書楊守隨舊事。罰米二千石。宣府上納。

廷策會試中式舉人。賜呂柟景暘戴大賓進士及第。焦黃

中等一百十五名進士出身。胡纘宗等二百三十一名同進士出身。

改翰林編修顧清等爲部屬官。

先是焦芳子黃中會試中式。芳欲子爲殿魁。旣而取呂柟爲第一。黃中居二甲首。芳謂諸執事抑之。遂入言於劉瑾。改清等官。授黃中檢討。及劉宇子劉仁等六七人俱爲庶吉士。數月。黃中與仁等皆擢編修。

劉瑾因修理庄田。擅掘天地壇後土堆。侵占苗竹廠等處官地。及民居蓋房開店。

侵占官地五十餘頃。拆毀官民房屋三千九百餘間。發掘民間墳二千七百餘塚。

降湖廣按察司僉事楊沐爲武義知縣。

沐爲御史忤瑾故降之。

逮御史徐禎下獄。謫戍邊未行。死于獄。

禎江西新淦人。初知江陰縣。政蹟顯著。適朝覲。吏部奏禎天下治行第一。徵爲御史。差巡長蘆鹽課。劉瑾欲令割送該年餘鹽銀兩。禎弗從。瑾深銜之。後禎復命。俟於朝門。適遇瑾。又不行跪禮。即捏旨拿送錦衣衛。二次各杖三十。發肅州衛永遠克軍。禎傷重。死于獄。仍行原籍查禎男徐朴起解補伍。

以白鉞爲禮部尚書。

以浙江右布政邵寶爲湖廣左布政使。



逮前總制全陝都御史楊一清下詔獄尋釋之。

劉瑾惡其築邊太費大學士王鏊言于瑾曰。一清有高才重望爲國修邊乃可以爲罪乎。李東陽亦救之乃得釋還。

四月南京國子監司業羅欽順除名。

肇開武舉。

初兵部郎中楊廷儀能文。又大學士楊廷和弟。兵部尚書劉宇利其文學。又圖結廷和。凡章奏皆令廷儀草之。廷儀主議武舉照文場考試策論用翰林官爲主考。宇欲因議以自顯遂令廷儀具草。欲依倣唐之增置宋之詳定事。參酌會殿二試事例。少加損益。每遇文舉鄉試。

之年。亦將武舉預期。行移南北二京并十三省。令其轉行軍民大小衙門。出給告示。曉諭各色人等。如有究極韜畧。精通武藝。身家無碍。堪應武舉者。或隱於山林。或育於學校。或羈於戍卒。或系於仕籍。各赴所在官司投報。籍貫脚色。查審明白。屬軍衛者。禮送該管都司。屬有司者。禮送本布政司。俱送巡撫都御史。并巡按御史。其南北二京。并令軍衛有司。送南北直隸巡按御史。帶管考試。所考人才。如果謀畧弓馬可取。就令各該衙門。禮送兵部。會萃數目。請於次年夏四月開科。兵部堂上官。并提督京營總兵官。總領大綱。兵部司屬官。分理衆務。初九日。初場。較其騎射。人發九矢。中三矢以上者。爲合

式十二日二場較其步射亦發九矢中三矢者爲合式俱于京營將臺前較閱十五日三場試策二道論一道於文場席舍內試之照依文舉梓其姓名錄其弓馬策論之優者裝演成帖題曰武舉錄進睿覽上准行之今以爲例

致仕吏部尚書王恕卒于家贈左柱國太師諡端毅

恕以清忠勁節負天下重望爲近時名卿之冠年七十八致仕九十三而終臨終之日旣遷正寢戒家人曰吾氣已絕必有風雷還繞吾居爾輩謹無災當靜以待之比公方瞑目少頃震雷大風雨下如注家人相戒屏息良久方開霽乃敢舉哀及殮視公貌如生焉時正德戊

辰某月某日也。嘗聞河津薛瑄沒時亦有風雷之異。白氣貫空。經時乃滅。正人君子。氣與天地相感召者。固如是夫。

劉瑾假湖廣災傷爲名。奏差同鄉侍郎韓福出理糧餉。福科歛剝削。饋銀數萬。

江西按察司副使陳恪以巡按順天事忤劉瑾。矯詔罷爲民。

逮御史王時中下獄。枷法司前。謫戍遼東鐵嶺衛。

自正德初。逆瑾煽亂。毒痛海內。時中爲御史。杭疏極論瑾銜之。識名于屏。已而時中巡按宣大。見綱紀隳弛。上下玩愒日甚。則極意振厲。時總督劉宇。瑾私人也。嘗以

賊吏祈於時中。不從。瑾旣憾。又承宇言之。瑾矯詔逮繫。令荷重枷。露立三法司之前。三月數踣且殆。大學士李東陽力援之。乃釋。

劉瑾矯詔羅織孫需。巡撫河南事。罰米一百石輸邊。以王佐爲南京戶部尚書。

時遣科道稽覈各邊糧芻。先後巡撫憲臣多坐累繫獄。佐一日同尚書顧佐輩見瑾。瑾言及茲事。曰。朝廷必誅戮一番人。乃懼耳。佐曰。本朝未嘗戮大臣。恐不可開端。有毀吏部尚書許進者。瑾信之。語諸大臣曰。許進奸邪。若尚書劉宇可爲吏部。佐曰。佐與劉尚書素厚。與進交淺。然許素有時望。劉尚書恐不如。毀之者因譖曰。王佐

實黨進。瑾益怒。遂遷南京戶部尚書。欲姑遣之去。而徐圖之。

劉瑾矯詔封內臣馬永成谷大用等八黨父皆爲都督。召右都御史張憲回理院事。

以張泰爲南京都察院右都御史。

劉瑾矯詔令養母進士陳璋致仕。

璋登弘治乙丑進士。疏歸欲終身養母。母讓之曰。不聞舍孝子而爲忠臣者乎。吾得汝祿養足矣。促北上。以正德戊辰抵京。值逆瑾竊政。獲罪。遂矯命令致仕。大宰許進宣言於朝曰。古今曾有進士致仕者乎。欲爲周旋而力不可。同事者咸強賄之。璋曰。官以賄成。吾不爲也。即

怡然就道。及家甫二旬而母告終。識者謂天所以成孝子也。後瑾誅。應詔起用。

五月。命戶部左侍郎韓福兼左副都御史。督理湖廣逋賦。福附劉瑾。以幹辦取容。操切嚴急。民甚苦之。

南京大饑。劉瑾矯詔。勅南京運米三十三萬石。轉卹鳳陽。南京兵部尚書何鑑執奏止之。

鑑言。留都地方重於鳳陽。災傷甚於淮西。會同內外守備直言辨奏。始得停運。及得差官賑濟。

劉瑾懷挾私忿。將已故戶部尚書秦紘。通政強珍。各籍沒財產。家屬發遣充軍。

以張綵爲吏部左侍郎。

劉瑾矯詔羅織右都御史熊繡先撫大同。浥爛布豆罰米五百石。責親往輸。

六月。河南湖廣災。命南京工部右侍郎畢亨兼都御史。巡視之。

劉瑾矯詔以給事中安奎御史張亥盤糧報數不明。枷于東西長安門外。

執朝官三百餘人下詔獄。

時早朝有遺匿名書于丹墀者。上見之。命拾以進。書內備言劉瑾等亂政。瑾下殿入班詰問。無肯承者。瑾疑群臣所爲。乃分五品以下官三百餘人。出門跪聽處分。至午後不放。時酷暑。暴于烈日中。仆地死者十餘人。至



晚悉械送錦衣衛獄。追究竟無踪跡。李東陽奏。此事必  
一人陰謀所爲。同朝諸臣。倉卒拜起。豈能知之。乃釋。  
逮前戶部尚書韓文下獄。

瑾已勒文落職。猶銜恨未已。乃以戶部廣東司遺失簿  
籍。差官校械繫至京。下錦衣衛獄。考訊欲置之死。監禁  
數月。罰米一千石。押赴大同親納。續以他事。數次罰米  
二千餘石。家產不能償。皆稱貸以給。

逮南京戶部尚書王佐。致仕南京戶部尚書張縉下獄。

佐。縉以失冊籍。同韓文繫。罰佐米一千石。縉米五百石。  
吏部推林泮爲南京戶部尚書。劉瑾矯詔令致仕。

七月。以雍泰爲南京戶部尚書。

瑾以泰不附已。旣恨之。遂欲逐許進。

吏部推南京刑部署員外主事劉吉爲署郎中。劉瑾勒令致仕。

劉瑾矯詔罪都御史劉孟到任遲。枷于吏部門外。

時劉瑾益務嚴刻。以一百五十斤大枷。枷號威衆。暑雨晝夜不輟。莫敢少移。文臣垂首喪氣。惟恐獲罪。

八月。劉瑾勅令南京戶部尚書雍泰致仕。

保國公家人朱瀛謀傾許進。以劉宇代之。因進薦雍泰。南京戶部尚書。乘間言于瑾曰。許尚書佯爲恭謹。而外示抗直。如雍泰平日剛暴。爲山西按察使。辱打知府。爲都御史。巡撫宣府。辱打叅將。朝廷屢貶不用。今欺公

舉用。却又揚言於外曰。公因泰同鄉用之。非吏部本意。瑾大怒。立召原任文選郎中張綵入內。詰問雍泰貶謫來歷。如何不備入奏內。綵曰。奏稿備載。許尚書塗之。瑾索原稿視之。果然。於是以進爲詐。直票旨以屢欺罔斥之。

吏部尚書許進致仕。尋除名爲民。

時馬文升劉大夏俱以薦雍泰削爲民。進子誥讚俱調外任。

逮除名編修劉瑞。以妄薦雍泰。罰米二百石。輸大同。

逮致仕南京刑部尚書樊堂。以守松江裁減官布。罰米五百石。

劉瑾矯詔逮前兵部尚書劉大夏南京刑部尚書潘蕃下獄發大夏肅州衛蕃甘州衛各永遠克軍。

近倖素不悅大夏及大夏議革勇士議節光祿無名供饋歲省官府浮費數百萬近幸者滋不悅大夏既歸有激怒于上者太監竇瑾素重大夏叩頭諫曰此先帝意非劉大夏建白乃免時劉瑾日誅求臣僚劉宇與大夏有怨言于瑾謂抄沒大夏家得金數萬焦芳亦忌大夏其譖之瑾因廣西土官岑濬獄辭連大夏遂逮繫至京下錦衣衛獄將坐以激變土官罪死大學士王鏊曰岑氏未叛何名爲激變集大臣議都御史屠濬謂大夏不宜深罪瑾怒乃與劉宇謀謂大夏輕議夷人遷徙發

肅州衛克軍。大夏即雇騾車出都城。觀者如堵。所在罷市。父老涕泣。有焚香密禱。願大夏生還者。

進大學士楊廷和少保兼太子太保。

大學士王鏊議廢后吳氏之喪不可苟塋。從之。

劉瑾欲焚廢后吳氏之喪以滅迹。曰不可以成服。鏊曰。服可以不成。塋不可以苟。

劉瑾矯詔以劉宇爲吏部尚書。曹元爲兵部尚書。

南畿提學御史陳琳上言。惜老成。宥狂直。謫廣東揭陽縣丞。

琳因劉瑾陰排大臣。顯出臺諫。故言及之。

劉瑾矯詔行例。逃軍連坐。高王降佑。皆籍克軍。

九月。江西按察司副使王啟忤劉瑾。降廣西容縣知縣。啟爲御史時。敢言中貴。瑾銜之。故以他事降之。謝鐸有不挫心藏國士風之句。瑾又行令廣西巡按提問。罰米三百石。輸之官。已復有事。罰米二百石待命。會赦免。劉瑾矯詔留巡按陝西御史胡瓚二年。

瑾以已陝西人。瓚不附已。故僞旨留之。未幾。論遼東事。罰米三百石。

劉瑾禁各處有司不許奏災異。

瑾要朦蔽朝廷。杜塞言路。故禁之。

劉瑾怒都察院審錄重囚。內寫劉瑾傳奉字樣數多罪之。都御史屠滂等率十三道御史謝罪。

御史跪堦下。瑾數其罪斥責。皆叩頭不敢仰視。

致仕南京戶部尚書張縉坐總督漕運。改揚州兌二萬五千石於鳳陽上納除名。

劉瑾擅改舊制。添設征西將軍印一顆。

瑾欲將曹雄加陞伯爵。故先添增。

十月。調翰林學士張昺爲鎮江府同知。

昺見瑾長揖不拜。坐事謫之。

下陝西舉人郝序于詔獄。

序戶部侍郎郝志義之子。志義卒。序援例乞祭葬。劉瑾以爲無此例。遂下錦衣衛獄。問發克軍。瑾自擅政。大率抑文右武。尤崇重內臣。馬永成八黨父以封都督。造墳。

堽祭所命祭文皆李東陽撰。堽諫不敢言。

罷送各邊年例銀兩。

洪武永樂以來。天下鹽課俱開中各邊。上納本色米豆。商人欲求鹽利。預於近邊轉運本色以待開中。故邊方粟豆無甚貴之時。並無年例銀兩。自成化八年。開設榆林衛。巡撫余子俊增置城砦。陝西民供不繼。奏送江南折糧銀以補不足。然初亦以南京折銀例。每石折銀二錢五分。放支軍士。其後大同等缺乏。亦皆送銀補足。數皆不多。未有以萬計送者。至弘治初。戶部尚書葉淇與大學士徐溥議。奏准兩淮運司鹽課。於運司開中。納銀解戶部。送太倉銀庫收貯。分送各邊。鹽價銀積至一百



餘萬兩。人以爲利。而不知壞舊法也。瑾以爲祖宗朝無此例。命尚書顧佐查天順年以前年例銀數。使佐當劉瑾查問之時。答曰。昔鹽課在各邊上納。故無年例銀之送。後改鹽課納銀解京。故不得不分送各邊。如此。瑾必不怒。而反正鹽法。必不受其禍矣。乃朦朧以天順前無前銀例回報。使士民受害。識者短之。

巡撫四川都御史劉洪。服滿入闕。罰米二百石。輸松藩。四川渠盜藍廷瑞。鄔本恕起漢中。攻陷郡縣。起服闋家居。右副都御史林俊巡撫四川。兼贊理軍務。督兵討之。劉瑾矯詔行天下。強盜併家屬發遣。連親屬。

時錦衣衛邏校於近京州縣捕盜。不得併其無服親屬。

俱執送法司。法司承奉風旨。槩坐籍沒克軍。又山東梁姓者。自陳嘗捕盜七十人。乞照例陞土官巡檢。都御史覆奏。請查舊盜七十家窩主鄰佑。俱照新例籍沒發遣。大學士李東陽力言。免查究。

十一月。劉瑾創玄真觀於朝陽門外。大學士李東陽爲製碑文。

以吳文度爲南京戶部尚書。勒令致仕。

以陳金爲南京戶部尚書。

修撰何瑋見劉瑾不屈節。乞致仕。

以右都御史劉洪總督兩廣軍務。

十二月。起前江西提學副使蔡清爲南京國子祭酒。未至。

卒

清福建晉江人。平生好學。至老不倦。家極貧。雖位至四品。恒借貸於人。以自給云。

工部尚書李燧致仕。

劉瑾構前巡撫延綏都御史陳壽罪。罰米三石。石輸居庸。命都察院副都御史戈瑄清查牧馬草場。瑄辨疆界。嚴條約。不爲權勢怵。

己巳正德四年正月朔。

以邵寶爲右副都御史。總督漕運。尋令致仕。

劉瑾擅權。公卿多出入其門。寶一無所通。瑾銜之。數令人以危言撼之。不爲動。乃勒令致仕。

以山西提學副使王鴻儒爲國子祭酒。

鴻儒在山西有聲。劉大夏嘗對敬皇稱其可大用。吏部從人望用之。未幾以守正忤劉瑾回籍。

罷興化知府張嶺爲民。

嶺先任刑部郎中。時隆平侯張佑卒無嗣。弟姪爭襲。賂逆豎劉瑾囑之。不阿徇。正德戊辰三月。出守興化。瑾又鎖異香。不報。郡人戴大賓弱冠及第。瑾欲奪其舊聘。以弟之女妻之。復以囑嶺。亦峻拒不許。瑾怒。遂接隆平侯奪爵事。誣令罷歸家。

廣東兵備僉事吳廷舉督兵征十三村池水清洞巨盜平之。

召改洪鍾爲工部尚書。

二月。劉瑾矯詔行吏部。不時考察兩京及在外方面官。

劉瑾追論都御史戈瑄在浙江布政司時事。罰米七百五十石。

廣東兵備僉事吳廷舉疏請乞留庫藏以備兵興。不報。

劉瑾用事。令各省庫藏悉輸京儲。外索取鹽價。故廷舉論之。瑾銜之。

刑部尚書王鑑之致仕。

劉瑾遣計處湖貴邊儲吏科右給事中潘希曾。杖闕下。削職爲民。

三月。戶部尚書顧佐引疾乞致仕。從之。

劉瑾矯詔。罰致仕南京戶部尚書林洋米一百石。輸口外以柴昇爲吏部左侍郎。孫交爲吏部右侍郎。

以席書爲貴州提學副使。

以儲瓘爲戶部左侍郎。

以錢璣爲戶部尚書。

璣附瑾不次驟用之。

四川鎮守太監羅籥請便宜行事。大學士李東陽執奏止之。

東陽奏言。太祖高皇帝設官定制。在外都布按三司。

都司管兵而不管錢糧。布政管民而不管軍馬。又有按察司管糾劾問刑名。而軍馬錢糧皆不得管。其權蓋分。

而不專此

祖宗防微杜漸之深意永樂以後漸差都

御史在外巡撫其有番夷去處則置鎮守總兵官又後

差內臣一同鎮守撫安軍民防禦賊寇其權則同而不

專故

勅諭之詞曰會同計議停當而行毋得偏執違

拘未有一人專制一方者且如四川所奏則王府宣慰

皆其綜理夫以親藩之隆望土官之強悍彼心不服則

釁隙必生又如舊有草寇生發則調兵征勦土官必須

奏請所有關係尤非細故今旣革去巡撫若并付鎮守

衙門任其進止非惟事體不便恐鎮守一人亦自擔當

不起百五十年所未有者豈可一旦增添若天下鎮守

比例而行則其所係又不止一方而已乃批出止便宜

其餘如所議。

四月。少傅兼太子太傅戶部尚書武英殿大學士王鏊致仕。

時瑾權傾中外。雖意不在鏊。然見鏊開誠與言。勅亦間聽及焦芳用事。專事嬖阿。議彌不協。而瑾驕悖日甚。毒流縉紳。鏊遏之不能得。居常戚然。瑾曰。王先生居高位。何自苦乃爾耶。鏊曰。求去瑾意愈拂。衆虞禍且不測。鏊曰。吾義當去。不去乃禍耳。瑾使伺鏊。無所得。且聞交贊亦絕。乃笑曰。過矣。鏊懇疏三上。許之。賜璽書乘傳。歲支月米。以歸。時方危。鏊之求去。咸以爲異數云。

改洪鍾爲刑部尚書



廣東河源龍泉渠賊林貴謝祥鍾仕高構亂總督兩廣軍務右都御史劉洪督兵討之。

洪訓兵積儲百需咸備即督率群帥兼調狼兵合數萬餘軍勵氣奮勇直抵巢穴環圍而攻之甫兩月俘斬八千人追回被虜男婦一百五十二名口奪獲資畜器械無筭諸兇盡戮餘黨悉平捷聞上賜獎諭兼白金文綺

以王雲鳳爲國子祭酒

尚書張綏以人望起之始被命欲堅辭及有遺書言執政者誦太阻褻中士夫不爲吾用者當殺身滅家語於是雲鳳父大司徒佐曰吾老矣汝置我何處死乎不

得已泣而就道至無所餽瑾怒欲重以禍不能得而罷時國學教廢雲鳳以十有七約示諸生約束太嚴雖誹謗四出不爲動六館士子卒感服尋乞養病歸劉瑾矯詔以弘治中纂修大明會典壞祖宗舊制雜以新例悉毀之。

降吏部尚書梁儲爲右侍郎左庶子毛澄左諭德傅珪等皆降職大學士王鏊致仕免究惟李東陽如故五月逮廣東兵備僉士吳廷舉下獄。

時鎮守恣橫廷舉劾太監潘忠二十罪具奏有旨取省帑解京皆非正費曰貢進內也曰司禮監打點錢賂劉瑾也又疏便宜事忠亦誣列廷舉罪逮獄鞫之無狀止。

以枉道回家。械首吏部門前。主事宿建葦謀抹之。天官張綵取閱其諸藁。心賞其能。言於瑾。凡械首十二日放鴈門克軍。再月赦爲民。

命工部尚書才寬兼副都御史。總制陝西三邊軍務。孝宗實錄成。

進大學士焦芳。少師兼太子太師。華蓋殿大學士。

召南京吏部尚書劉忠兼學士。掌詹事府事。

改翰林侍讀徐穆編修。汪俊等爲南京部屬。

先是劉瑾惡諸翰林不行跪禮。及修孝廟實錄成。例進秩瑾謂文士不習世故。摘所忌十餘人。陞調南京員外郎主事等官。俾擴充政務。

以畢亨爲工部尚書。

以吳洪爲南京刑部尚書。

劉瑾矯詔罰致仕戶部尚書顧佐米一千二百五十石。

時命官按三邊儲蓄有紅腐。則以爲佐罪。時去邊三年餘矣。詔罰輸米八百石于邊。遼東邊糧以菽易米。弘治中有旨准行。又以爲佐罪。罰三百石。戶部有缺失。又爲佐罪。罰輸一百五十石。

太監谷大用傳旨令臨清鎮守開皇店。劉瑾捕獻計者罪之。

大學士焦芳以老病致仕。

六月以石琚爲南京國子祭酒。

以少傅兼太子太傅吏部尚書劉宇兼文淵閣大學士內閣辦事。

以張綵爲吏部尚書。

時吏戶兵尚書皆瑾黨。

掌都察院事吏部尚書屠滂因劉瑾欲誣商人入宣府糧者以盜罪不從奪俸遂致仕。

七月日本南海曾遣使來貢。

召南京戶部尚書陳金爲左都御史掌院事尋丁憂。

廣東樂昌仁化猺獞與郴桂賊構逆總督兩廣右都御史劉洪調狼兵及官兵二萬討平之捷上賜金幣獎之八月崇王之國常德。

劉瑾受都督神英厚賂。擅加涇陽伯爵。給與誥券。英無開疆闢土大功。以賄得之。

遣御史胡汝礪周東楊武顏願壽等。往各邊清理屯田。劉瑾既止各邊年例銀兩。又不令商人在邊輸納鹽課。邊儲遂大匱乏。因詢國初如何充足。議者以爲國初屯田修備。故軍食自足。後爲勢家所占。以此軍不自給。瑾慨然修舉屯田。分遣御史胡汝礪周東楊武顏願壽等。各往邊丈量屯田。以清出地畝數多。追及完積逋者。爲能否則罪之。於是各邊增屯田至數百餘頃。悉令出租。周東在寧夏與都御史安惟學比較屯糧。尤嚴加刑於軍官妻子。人心憤怨。指揮何錦等遂與安化王謀起兵。

以誅瑾等爲名瑾禍始於此矣

按鹽法復舊令商人上納本色則商人佃種遙地不致荒蕪鹽課有資屯糧日辦苟不復正法止清屯田則遠人無力耕種子粒仍無從出適擾貧軍以釀亂也

劉瑾矯詔羅織南京兵部尚書何鑑巡撫江南事罰米七百石原籍上納

劉瑾票本張文冕先以詐僞事鑑捕置于法後亡匿附瑾朝夕扇禍無所不至竟誣松江布事於瑾罰米困之繼又捏闕里修造事罰米二千石寧夏上納鑑計無所克戶部爲乞恩寬宥上特命蠲之

劉瑾招引四方術士余明余倫余子仁等占候天文相面

筭命。

明等妄稱瑾姪劉二漢後有大貴。

九月畿內盜起遣御史甯杲殷毅薛鳳鳴督捕群盜。

京師之南固安永清霸州文安地方京衛屯軍雜居其地。人性驕悍。好騎射。往往邀路劫財。號爲響馬盜。至是聚黨益熾。劉瑾遣御史甯杲于真定。殷毅于天津。薛鳳鳴于徐淮。專一捕盜。舊例御史出差不得以家口隨至。是許杲等各攜家以滅賊爲期。

吏部推張泰爲南京戶部尚書。劉瑾勒令致仕。

泰奉表入賀。惟以土葛布遺瑾。瑾銜之。

改南京禮部尚書張燦爲南京戶部尚書。



皇明大政綱 卷一  
以孫需爲南京禮部尚書。

閏九月。改刑部尚書洪鍾兼左都御史掌都察院事。

奪平江伯陳熊爵。

陳俊之得罪也。瑾因以及漕運總兵官平江伯陳熊以濕潤米數估銀爲賍。遂與大獄。必欲寘之死地。大學士李東陽乃力爭之。瑾謂熊所犯罪重不宜姑息。東陽曰。予誠姑息。但非姑息陳熊。乃姑息陳瑄耳。瑄在。太宗朝開濟寧河道以通漕運。有大功。勒銘鐵券。子孫皆免死。豈可盡革。傷天下武臣心。瑾曰。國初功臣如常遇春。鄧愈。湯和輩。百戰之功。今其子孫俱已革罷。陳瑄不曾。廝殺有功。當代豈足深惜。東陽曰。漢高祖親定十大功。

臣以蕭何第一。蕭何不曾廝殺。但因供給餽餉不絕。遂以爲萬世之功。蓋足食然後足兵。使當初餽餉不繼。雖百張良、十韓信。豈能助漢。蕭何餽餉猶是一時爭戰之功。陳瑄通南北漕運。每歲四百萬石至京師。誠國家萬年之利也。瑾不答。

劉瑾矯詔下刑部侍郎陶琰獄。勒爲民罰米四百石。追奪誥命。

陝西遊擊徐謙。訐奏御史李高。而謙故劉瑾黨也。又厚賂瑾。欲中高以危法會。上命琰往覈其事。琰據法直高。謙以告瑾。瑾遂矯詔下陶琰獄。禁錮幾兩月。乃罷官去。

劉瑾誣平江伯陳熊賍私逮獄黜伯爵籍沒財產全家押發海南衛充軍

瑾聽譖及怪伊不通賄賂故羅織之法司問監守自盜雜犯死罪緣係應議大臣上請被瑾將伊先朝給有免死誥券盡行追奪

十月虜寇寧夏殺總制全陝工部尚書兼副都御史才寬陝西三邊自罷楊一清劉瑾主革總制至正德四年北虜倡獮復用寬寬奸野戰不拘戰陣畧一切裁決自將值大虜在套率師由興武營擊之斬首數十級徂勝深入忽伏兵起中流矢卒于陣中事聞廕子錦衣衛百戶世襲

四川保寧流賊劉烈聚衆作亂僭號稱王侵掠陝西漢中等處

罰南京禮部尚書孫需米二百石輸邊尋令致仕  
復梁儲吏部尚書。

十一月劉瑾傳旨降徐淮捕盜御史薛鳳鳴爲徐州弓手。  
鳳鳴在歸德與守備指揮石璽會飲歌舞爲樂瑾遣邏卒緝知之傳旨降鳳鳴爲徐州弓手。

以張憲爲南京禮部尚書尋令致仕。

瑾惡憲不附已月餘內勒令致仕。

劉瑾超陞曹雄爲左都督。

巡按御史劾都督僉事曹雄臨陣退縮不救總制才寬

被虜殺虎劉瑾挾私切責御史反超陞曹雄

罰雲南叅政王鎮米五百石。

鎮任工科給事中。忤瑾故以他事罰之。

劉瑾私置軍器。

瑾懷異心密令兵仗局太監孫和等置造衣甲牌面千餘副私假寶一顆又令兩廣太監蔡昭潘牛製造弓箭五百餘張匿藏私宅。

十二月保寧流賊藍廷瑞僭稱順天王鄆本恕僭稱刮地王廖惠僭稱掃地王合衆十萬入寇湖廣鄖陽等處藍賊等因四川巡撫都御史林俊督兵捕勦流侵入湖廣境。

改右副都御史林俊巡撫四川兼理松潘安綿建昌等處邊備。

時四川盜熾劫財殺人故移俊撫捕之。

四川流賊劉烈等復還本省勅巡撫副都御史林俊相機截殺凡事從便宜區處。

初劉烈等四出搶掠侵入陝西漢中西鄉縣等處地方。僭稱王號勢漸猖獗至是復還四川地方故再勅之勅內除首惡正犯不宥外其協從餘黨照例釋放。

改掌詹事府事吏部尚書梁儲于南京吏部。

瑾惡儲不附已。

亦不刺阿爾禿廝掠西寧諸番。

庚午。正德五年正月朔。

劉瑾禁察諸司饋遺。

吏部尚書張綏嘗勸瑾云。今天下諸司。公有餽送公禮物者。非取于官庫。則斂于民。取怨貽患。所當知也。瑾遂禁察饋遺者。時因饋得罪者甚多。剝削之弊。一時少息。命刑部尚書兼左都御史洪鍾總督川陝湖廣河南四省軍務。征勦四川等處流賊。

以劉璟爲刑部尚書。

戶部左侍郎儲瓘乞致仕。許之。

劉瑾矯詔增陝西河南山東山西解額。

左侍郎叢蘭整理陝西邊儲。

陞真定捕盜御史。寧杲天津捕盜御史。殷毅俱爲僉都御史。仍專督捕盜。

杲在真定。奏立什伍連坐之法。盜賊捕獲無虛日。每械繫盜賊入真定城。用鼓吹前導。金鼓之聲。彌月不絕。由是奸人無所容。盜賊日甚。內官張忠姪張茂爲盜窩主。杲親往捕斬之。啖其心。霸州盜劉六。劉七。齊彥名。因聚衆爲亂。毅亦捕盜有功。

禮部右侍郎掌國子監事。致仕謝鐸卒。贈尚書。諡文肅。鐸性孤介。廉直。取與進退。一斷於義。雖未究其素志。而激貪立懦。蓋有足尚云。

二月。進楊廷和吏部尚書。兼武英殿大學士。以太子太保。



兵部尚書曹元爲吏部尚書兼文淵閣大學士俱內閣辦事。

元爲瑾黨故矯詔用入內閣。

以胡汝礪爲兵部尚書未任卒。

劉瑾擅令內使將小刀二把暗藏扇內出入禁闥。

巡按山東御史胡節回欵銀欲送瑾偵知之捕下獄死。

劉瑾出太監張永于南京谷大用等解留之。

瑾欲盡除軋已者一日伺間言于上調張永于南京。

旨未下卽日逐永出就道榜諸禁門不許放永入永覺之直趨至御前訴已無罪爲瑾所害召瑾至語不合永卽奮拳歐之谷大用等解之令諸近臣皆置酒和解。

新署都指揮僉事楊宏克副總兵分守松藩等處地方。  
三月禮部尚書致仕周經卒。贈太保諡文端。

經山西陽曲人。掌邦計。秉正執法。不爲權勢所撓。識大體。先恤民而後惜財。語及民病。痼痼在身。寬逋負。緩征歛。裁冗食。一時善政多出。經建白四方以災傷告者。必覆奏蠲之。屬吏有務刻以爲功者。下其考。人始向慕爲惇大寬平之政。掊剋聚歛之風。爲之稍革。天下陰受其賜。宋李沆不用浮薄新進喜事之人。王旦懷權利至民力竭之念。經實兼之。

以王敞爲兵部尚書。

少監李宣侍郎張鸞錦衣衛指揮趙良差往福建回。歛銀

二萬饋劉瑾。瑾奏收其銀于承運庫。宣等皆降黜。

宣降長隨。良降南京百戶。驚以不知情致仕。

沔陽洞庭水寇丘仁、楊清等攻掠城邑。官軍屢失利。總督軍務洪鍾以計擒滅之。

以朱恩爲南京禮部尚書。

恩以賄劉瑾陞瑾誅。以人言罷。

四川播州土官楊友賄劉瑾復宣撫。巡撫都御史林俊抗論不宜復。不報。

友與兄愛爭襲仇殺。已奏革其宣撫。乃以萬金賄瑾求復。俊言亂階不可啟。忤瑾意。

四月。劉瑾矯詔。令南京刑部尚書吳洪致仕。

寧河王鄧愈之後有兄弟爭所賜田宅者。詔南京三法司覈之。其兄倚瑾爲援而求勝焉。洪不從。

慶府安化王寘鐸反。殺總兵姜洪。巡撫都御史安惟學大理寺少卿周東。

初寘鐸與寧夏衛儒學生員孫景文孟彬往來情熟。說有人相我帝王相貌。又有師婆王九兒假降鸚鵡神。呼寘鐸是老子。遂懷不軌。及何錦周昂托孫景文借寘鐸銀。納級陞都指揮。恩深。至正德四年。鐸邀錦等飲酒。間說劉瑾竄逐大臣。料道求面結張綵劉機。外邊結曹雄等。大出校尉紀敝金榮等百餘人。訪察害人。恐人進本。捏罵旨打一百。全家克軍。杜絕人言。若等扶我爲主。

以討劉瑾爲名。以成大事。錦等聽允。對天發誓。不許泄漏。及瑾差周東丈量寧夏地土。每地五十畝。量作一頃。又每一分要銀一錢。奏送劉瑾。人情不堪。鐫乘衆忿。遂與何錦周昂丁廣等。於四月初五日。集衆僞鑄印章。封拜賊黨。撰成告諭榜文。內開劉瑾不法事情。傳檄以誅瑾爲名。關中大震。

陝西守臣將寘鐫等刊印劉瑾激變罪惡告示榜文。封奏瑾容匿不行奏聞。

總兵曹雄等率兵沿河堵截。差廣武營指揮僉事孫隆將大小二壩積柴捲掃柴草。盡行燒毀。

鐫差魏鎮等到廣武營散賣。孫隆用弓箭神鎗射打却。

之

遊擊將軍仇鉞領兵執寘鐠拜殺逆黨周昂等。餘黨悉平。初總兵曹雄令家人持書約鉞內應。值四月二十三日早。有寘鐠出城祭祀社稷旗纛等神。使人喚仇遊擊陪祭。仇鉞推病不出。周昂自來看望仇。就乘機密令伴當陶斌將周昂抱住。仇遊擊同家人來得用鐵骨朶打死。周昂割下首級。卽開門吹號頭招呼原約遊兵親信官軍楊真等一百餘人。前到寘鐠府內。將朱霞王環姚鐸李榮孫景文史連孟彬高嵩夏琳朱洗陳宗俱就殺死。又將李蕃張會通拜儀賓謝廷槐韓廷璋擒獲。及將寘鐠拜官眷柩係在官。就令軍人荀子先馳報曹總兵。又

執何錦丁廣于外拜誅其黨。

上聞寘鐫反頒詔天下慰安人心。

詔內有宥克軍罰米官員停徵糧草等件。出內閣草。內一款取回各處差出官校。瑾不然曰。是要謹行事衙門。此係累朝舊例。如何可革。大學士李東陽曰。舊例行事官校。只在京城。今差出四外。聲勢烜赫。驚疑天下。奸詐之徒。因而矯托。真僞莫辨。近已累犯。煩朝廷處分。若真者取回。則僞者無所容矣。因以天順元年舊稿示之。瑾乃語塞。

命涇陽伯神英克總兵官。太監張永總督軍務。太監陸闇管領神鎗。起前右都御史楊一清爲提督。帥中外兵討寘。

鐔

朝內不知四月二十三日仇鉞已擒逆黨故出師時統率京營兵三萬討寘鐔會合陝西諸鎮兵馬分道進剿各賜璽書得專制以軍法從事且命戮止渠魁脅從罔治以功贖罪者得從其賞格

以劉纓爲南京刑部尚書

以劉洪爲南京都察院右都御史掌院事

五月劉瑾矯詔改戶部右侍郎陳震爲兵部右侍郎兼倉都御史先討寘鐔暫行總制事

震附瑾由光祿寺卿陞戶部右侍郎瑾倚之爲腹心會寘鐔反衆推楊一清提督軍務瑾屈於公論不得已從



之然度一清必辭。故差震彌縫其缺。冀其成功。將柄用之。

提督軍務右都御史楊一清上疏乞將京軍取回。以安反側。上詔涇陽伯神英以兵回。勅張永及楊一清仍往寧夏撫安地方。

時道路相傳。總督率京兵將洗寧夏城。一清恐激成大患。故疏乞取回京兵。仍遣百戶常臣賁牌曉諭寧夏官舍軍民。大賊已擒。地方無事。天子遣二三重臣來撫定爾軍民。又出給告示。朝廷止誅首惡。不究脇從。有功者許錄用。各部官員不許聽人仇攀誣指。敢有捏造流言者。治以軍法。

侍郎陳震將寘鐺等械送京。右都御史楊一清遣官賁鈞帖止之。

一清以事干宗室。既無上命。豈可擅發。且人心未定。處置少踈。恐生他變。又各犯有原謀。脇從情狀不一。審鞠未實。一槩解京。莫適爲証。將無可活者矣。乃遣官賁鈞帖馳往止之。如已渡河。則收繫靈州以待。

提督軍務右都御史楊一清會太監張永檄鎮守撫按督同三司官公審。分別首謀共謀。隨從等第。奏聞下法司議從之。

時鎮巡公移逮上千餘人。一清慮事同情異。宜有區別。又恐有不該連坐者。混逮其間。乃會詢族鄰長老。於是

堂侄以下。子壻許嫁之女。并雇工人役出之。凡百餘人。惟申居敬等六十家。平虜城官舍徐欽程保等一十一家。法當連坐。一清又謂申居敬等。一聞周昂逆謀。卽有樂從之意。殺人劫財。乘機爲亂。若欲比諸脇從。則情重法輕。但舉事之日。方預其謀。義兵一動。當卽戢止。比之原謀首惡。事有不同。徐欽程保等聽調從逆。但事後方入城。不曾相助殺掠。俱止宜逮其身。而繫其家屬。以俟誅正犯而徙其妻子。

楊一清會張永密諭鎮巡捕遺姦指揮馮經等。奏上。伏誅。一清謂永曰。恩威當並行不悖。大變之後。堂陞陵夷。不復知上下之分。恐漸不可制。維時造僞命僞符手刃大

臣者。戎殺主將。而奪其家者。有遺姦焉。將無以善後宜密令所司捕之。

楊一清會張永具奏。慶府失節。請勅切責警戒。及申明禁例。通行天下。以杜交結。從之。

削慶府護衛。以真鐔典伏所編克興武營戎任。皆一清建白。

工部侍郎俞俊於京城內永昌寺舊城買濶添蓋倉廩。工成。賜紵絲襲衣。及御製詩書。

六月京師旱霾。

命楊一清總制陝西三邊軍務。瑾不欲一清還京。遂留總制。

大學士劉宇致仕。

宇附劉瑾排斥正人。知瑾將敗。先乞身求免。

以俞俊爲南京工部尚書。奉勅馳驛。

劉瑾聞寧夏平。捏旨誇已功。加添祿米。超陞兄劉景祥爲都督。

大學士李東陽疏弭災四事。不報。

東陽因旱霖上疏曰。近時威令大行。中外悚懼。但霜雪之後。必有陽春。雷電之後。必有甘雨。此天道所當法也。臣謹條上。一曰寬逋軍拐馬之罪。二曰寬僉書職員之罪。三曰寬查盤糧草之罪。四曰禁官校羅織之罪。疏上不報。

劉瑾矯詔黜都御史周南爲民。再繫大同獄。

初南以查盤糧草汜爛繫大同獄。值真鐸反。赦天下。命復職聽用。劉瑾惡其不叩門。仍繫之。

七月。四川威州茂州等處地震。有聲如雷。

未幾。潼川州樂至縣皆地震。

四川流賊藍廷瑞廖惠等攻破通江縣。

劉瑾恨詔書不出已意。將原有克軍罰米官員停徵糧草等件。仍舊查發追徵。

召石琚爲國子祭酒。

琚在南監立法嚴整。濟之以恕。時閣瑾用事。以勵精爲名。士大夫當官。亦附會振作。南京禮科因監生查對軍

冊有患病。不容給假。珪力主准假。南京戶科因晒晾黃冊。有不至者。輒行典簿廳取供。令其每夕盡酉。珪以祖宗成憲。不敢擅改。答之。諸生感悅。會廷臣議令納銀監生。增報年歲。或謂將揀選聽點。人情恟恟。珪拘集至班。惟令遞增一歲。繳冊至部。亦竟無他。人益服其有見。右都御史楊一清。繳提督軍務勅。專行總制事。條陳地方十數事。下部議之。

大者如請蠲寧夏各路旱傷稅糧。以恤困窮。溥賞賚恩典。以安反側。乞旌罵賊而死都指揮楊忠。李睿。逃難而殞百戶張欽等門閭。仍廕卹其兒男。以勵臣節。改調管糧叅政等官。及復設按察司僉事。監理軍糧邊儲。極論

各城堡糧儲缺乏請發內帑如舊例召商輸納以免派買之患皆與瑾意相忤比瑾敗誅該部覆奏皆報可

延綏鎮巡奏欲因燒荒會諸鎮兵搜索河套零賊都御史楊一清疏止之

一清疏言漢中流賊未平調去沿邊官軍數多邊城空虛邊儲缺乏而河西達賊日肆搶攘又恐河凍之後大賊沿冰入套各鎮兵馬正當蓄養鋒銳以俟今乃無故出境窮搜縱得數輩老弱殘敗餘寇何補於事而往來動經旬月糜費糧料傷損馬匹所得不償所失且舍門庭侵犯之虜而尋伏藏逃難之賊取笑外夷又遺書當道極論其事竟寢不行



劉瑾故入見監指揮徐鯤斬罪全家發廣西南丹衛永遠  
充軍家產沒入

鯤抄有寘鑄累劉瑾罪狀令旨與人傳誦故瑾陷之。  
巡撫寧夏都御史馬炳然丁憂不補其缺劉瑾令總制楊  
一清專在寧夏居住撫馭。

瑾忌一清令吏兵二部咨行蓋陰奪總制之權也。

八月太監張永回京獻俘寘鑄伏誅。

劉瑾謀不軌伏誅籍其家。

瑾擅政五年毒虐遍中外無不怨恨切齒者張永既憾  
瑾征寧夏平與楊一清定謀誅瑾永既回京獻俘與素  
所厚宦侍張雄張忠等乘間共訴于上言瑾流毒海

內激變寧夏。心不自安。陰謀不軌。其形已具。宜早擒之。因疏其大罪十七事。上猶豫未決。永等曰。少遲我輩皆齏粉矣。陛下安所之乎。上乃允其奏。卽命禁兵逮瑾。永等勸上親至瑾第觀變。時漏下三鼓。瑾方熟寢。禁兵排闥入。瑾驚起曰。事可疑矣。趨出戶。遂被執。就內獄。次日早。太監溫祥等持疏至。入內閣讀畢。李東陽徐問曰。今當如何。祥曰。已收逮矣。東陽曰。此聖政也。天下望此久矣。祥輩乃曰。須傳旨行之。東陽乃援筆擬進。上降旨。瑾罪幾百餘言。皆應死律。末云。劉瑾所壞事情。科道官指實來說。異日科道列劉瑾罪惡十餘條。乃下瑾鎮撫司獄。會鞠于午門前。得其私製兵甲刻。

期起手罪狀明白。坐謀反。於是降旨。極言罪狀。特令凌遲三日。諸被害者爭食其肉。嚼之。須臾而盡。天下聞而快之。是時籍瑾書籍。得秦府永壽王爲瑾慶壽詩序。中間稱謂過於卑諂。上怒。欲降旨切責。東陽上疏曰。自古治亂賊首正名定罪。誅止其身。昔漢光武平叛賊王卽得吏民交通文書數千章。不一省視。會諸將燒之。曰。令反側子自安。歷代相傳。以爲故事。當劉瑾專權亂政之時。假托朝廷威福。以劫天下。生殺予奪。惟其所欲。中外臣工。誰不屈意待之。往來書信禮意。雖於律法有碍。但因畏罪避惡。多不得已。情有可原。況王府懿親。尤宜優待。自非同惡助叛。法不可赦。其細故小過。亦須曲

賜包容。若據實論罪。降旨切責。則凡有書信饋送者。不知其幾。傳聞驚駭。各不自安。或愧懼終身。或遂至失所。不可不爲之慮。今劉瑾罪狀明白。已正典刑。伏乞聖明洞察。廣大涵容。將此壽詞置之不問。并一應文書涉瑾事情者。併行燒燬。以滅其迹。使人心安帖。事體穩當。上以爲然。於是悉焚其往返文字。無延及者。及抄沒財產。金二十四萬錠。又五萬七千八百兩。銀元寶五百萬錠。又一百五十八萬三千六百兩。寶石金甲。蟒衣。袞龍袍。金龍盛甲。玉印。玉琴。玉帶。數多。皆籍內帑。

大學士劉宇。曹元。及劉宇子編修劉仁。以附劉瑾。罷爲民。前大學士焦芳。及子侍讀焦黃中。以附劉瑾。並除名爲民。

黃中狂恣無耻。時土官岑濬沒入家口。內有殊色。芳聞求瑾得之。後臥病。黃中淫烝。天下嗤之。瑾誅。言官交章劾其罪。遂並褫職。

論平寘鐸功。封仇鉞爲咸寧伯。

禮部左侍郎費宏奏。山東河南陝西山西解額。係劉瑾增者。今科姑聽。俟後科復舊。從之。

戶部尚書劉璣。兵部右侍郎陳震。以附劉瑾。罷爲民。

召總制全陝楊一清爲戶部尚書。

一清與張永謀誅瑾有功。故召之。

封張永兄張富爲泰安伯。弟張容爲安定伯。魏彬弟魏英爲鎮安伯。馬永成弟馬山爲平涼伯。谷大用弟谷大珣爲

永清伯封義子朱德爲永壽伯。給諫劾世襲。

大學士李東陽奏。旬月之間。二難交作。悉底平定。皆太監張永等之功。故加恩典。

廢大學士李東陽楊廷和子爲尚寶司丞。尚書楊一清子爲中書舍人。

命太監魏彬掌司禮監事。

時劉瑾雖誅。而政權仍在內。彬旣掌司禮監。決大政。而馬永成等又奏有旨。朝廷大事。須彬等同議。瑾雖有旨云。凡瑾所行亂政事件。各衙門逐一查革改正。而又云。百官緘默順從。皆非得已。又云。羣人衆。都不查究。于是逆瑾流毒尚在。而彬永成等濁亂朝綱。賞罰乖宜。

山東河南北直隸江西四川諸處盜賊蜂起而天下不勝煩擾矣。

改劉機爲吏部尙書。

機生長都城與庵堅綢繆日深營魏彬改用。

詔革寧王護衛仍爲南昌左衛。

逆瑾事敗兵部因言奏革之。

四川巡撫都御史林俊疏改弊政不報。

時逆瑾雖誅而張永繼用事上好遊樂時宿于外而

皇儲未建俊甚憂之遂於川中復上疏請上還內宮

擇宗室之賢者養于別宮收召先朝故老劉健謝遷林

瀚王整肅文以修復舊政又言瑾雖死權柄猶在宦豎

安知後無復有理者其詞指剗切大忤左右用事者工部尚書畢亨疏劉瑾不法事請釐革內官請討立祠例魏彬等矯詔令亨致仕。

時亨請拆毀劉瑾原籍陝西祖塋且云內官修墳不係舊例宜悉革罷魏彬等大怒曰洪武初制豈有文官修墳例耶遂票旨劉瑾祖塋不必拆毀勒亨致仕。

復前大學士少師劉健少傅謝遷吏部尚書許進戶部尚書韓文兵部尚書劉大夏工部尚書楊守隨南京兵部尚書林瀚左都御史張敷華官致仕。

詔奪神英涇陽伯。

詔復陳熊平江伯。



詔革寧夏護衛屯田。

順天府奏鄉試取中式舉人王江等一百三十五名。

主考翰林學士傅珪侍講學士毛澄。

應天府奏鄉試取中式舉人孫繼先等一百三十五名。

主考侍讀學士蔣冕侍講朱希周。

九月以誅逆鐔逆瑾詔天下。

以劉忠梁儲並爲吏部尚書兼文淵閣大學士直內閣事。  
以王瓚爲南京國子監祭酒。

改禮部尚書白鉞兼學士入東閣管誥勅兼管詹事府事。  
起右副都御史邵寶巡撫貴州道改戶部右侍郎疏乞終  
養。

以羅玘爲南京右侍郎

總兵馬安敗流賊于景州

進楊廷和少傳謹身殿大學士劉忠梁儲少保並武英殿大學士

陞龍場驛丞王守仁爲廬陵知縣

守仁抵任稽國初舊制慎選里正三老委以詞訟坐視其成囹圄清鞫

詔復劉瑾陷害給事中湯禮敬等十六人御史陳琳等二十五人官查明叙用

給事中湯禮敬陳霆徐昂陶諧劉蔭艾洪呂獅任惠李光翰戴銑徐蕃牧相徐暹張良弼葛嵩趙士賢御史陳

琳貢安甫史良佐曹蘭王弘任諾李熙王蕃葛洪陸崑  
張鳴鳳蕭乾元姚學禮黃昭道蔣欽薄彥徽潘鏗王良  
臣趙祐何天衢徐鉅楊璋熊卓朱廷聲劉玉

起前副都御史陶琰總督漕運兼理巡撫

琰軍車至鎮廉得諸倖豎官民之豪滑者悉治以律。權  
勢斂手。且淮安乃南北咽喉。貢獻必由之路。中使往返  
求索無厭。而督運武臣又往往侵漁其間。爲奸利事。軍  
民並病焉。乃榜諭以法。常廩之外。一毫不少假。而率以  
勤廉。俾知敬畏。未嘗有一人敢犯禁者。

起爲民僉事。吳廷舉爲雲南副使。未行。陞江西叅政。

起致仕。張憲爲南京工部尚書。

以張燦爲南京吏部尚書。柴昇爲南京禮部尚書。

十月以費宏爲禮部尚書。

南道御史張芹劾大學士李東陽不聽。

芹疏東陽當劉瑾專權亂政之時。阿諛承順。不能力爭。及陛下任用得人。潛消禍變。又攘以爲功。冒膺恩蔭。乞賜罷黜。

巡撫四川都御史林俊奏擒獲賊首廖惠。并斬賊級。降勅獎勵。

俊發官兵及僱回石硅等處土兵討賊。擒斬三千餘名。奪回男婦六百餘名口。騾馬一千餘頭。并兵仗衣物。被追落崖溺水死者不計其數。惟藍廷瑞奔紅口。與鄔本

恕會合入陝西漢中三十六盤至大巴山

起致仕左侍郎儲瑾復爲戶部左侍郎

起除名司業羅欽順復補南京國子監司業

致仕吏部尚書許進卒

進諳練政體嘗指畦蔬曰爲政如理此蔬須備知某可灌某可藝斯茂矣貿貿爲之能不亂乎哈密之復擁夷夏之衆深入前代兵馬未到之地而成安攘之功識者難之在兵部南北邊方重大機宜文書無日不至改閱如流案無停牘諸司事體累朝詔例不一吏員緣爲奸乃擇僚屬有識者通查類集成編欲奏請會官定議如見行條例永著爲令未就而改吏部至今未有繼其志

者在吏部每會議六部大事進既諳熟國家典故數語之間無不允愜性雖嚴毅至後進謁見必留語良久果善用之不啻已出蓋有古大臣風焉

掌詹事府事禮部尚書兼學士白鉞卒

鉞爲人重厚政尚寬簡不爲骯髒之行瑣屑之節值事所難處多爲遜避未嘗遂失乎正

十一月大學士李東陽上疏勸上安處宮闈溥施恩澤不報

東陽疏曰天下者祖宗之天下上天所付託生民所仰賴高皇帝櫛風沐雨十餘年而後定何其勞也

文皇帝南征北伐定鼎貽謀亦二十餘年而後成何其

難也。列聖相承兢兢業業。固有怠荒。先帝顧命。惟欲陛下早嗣大位。早成大婚。光前裕後。衍無疆之澤。聖慮所及。何其深且遠也。臣願上念上天托付者重。思祖宗授受者隆。體生民仰賴者切。每朝奏講讀之暇。安處宮闈。溥施恩澤。起居有節。遊豫以時。保養天和。培植國本。則六氣不能侵。百邪不敢近矣。

起章懋爲南京太常寺卿。辭不赴。以傅珪爲吏部右侍郎。

起致仕。李燧復爲工部尚書。

太監張永矯劉瑾奢僭之政。以窮苦魚菜四字爲題。屬大學士李東陽等各作長詩。命工部刊印傳之。

東陽爲窮字詩。拆點畫爲句。極工巧。永大悅。說者謂不  
幾流賊殘毒中原。爲窮之應。

起爲民潘希曾爲刑科右給事中。

起致仕楊茂元爲江西右叅政。

起御史胡瓚爲南京大理寺丞。

起容縣知縣王啟爲四川蓬州知州。以總督兩廣右都御  
史林廷選薦。陞南雄知府。

戶部尚書楊一清奏。行各處邊境巡撫將見在官銀。招糴  
以備軍儲。

十二月。陞廬陵知縣王守仁爲南京刑部主事。

致仕叅議賀欽卒。



欽字克恭世居定海其先成廣寧後屯遂爲遼西人欽不務博覽惟讀五經四書舉進士爲給事中上䟽解官遊於陳獻章之門反身實踐薦授叅議尋以母老䟽辭晚更好易究心象數手不釋卷旣卒鄉人祠之學者稱爲醫問先生

吏部尚書劉機以人言致仕

尊太皇太后王氏爲慈聖康壽太皇太后皇太后張氏爲慈聖皇太后

起養病御史聶賢爲雲南按察司副使

遷濟寧州知州張宗爲山東道監察御史

初署都督僉事昌佐克總兵官鎮守四川地方

辛未正德六年正月朔

巡撫四川都御史林俊乘元旦進兵圍燒江津逆賊曹甫等殲之。降勅獎勵。

曹甫僭稱順天王。攻圍縣治。僉事吳景被殺。巡撫林俊聞報馳赴。乘元旦賊方醉酒不設備。乃夜半蓐食。衝枚而往。圍而燒之。賊奔竄。又於山坪伏子岸等連戰連敗之。抵賊營。殺死曹甫等。先後共斬獲賊級八百餘顆。殺死四百七十。燒死七百餘人。擒獲賊屬男婦七百餘名。口。收回男婦七百有餘。奪獲馬騾器仗等項數多。人心痛快。地方悉平。

以楊一清爲吏部尚書。

召南京吏部尚書孫交爲戶部尚書。

起李夢陽爲江西提學副使。

調南京刑部主事王守仁爲吏部驗封司主事。

召何鑑爲刑部尚書。

二月起何塘復爲翰林修撰。

勅諭天下鎮巡并三司等官痛自修省。

進士陳璋奉詔起用授刑部主事。

起劉玉爲河南提學僉事。

命大學士劉忠學士靳貴主考會試賜宴禮部。

撤棘取中式舉人鄒守益等三百五十人。

巨盜劉七等聚衆攻安肅縣劫去在獄盜黨齊彥名以叛。

時窮民響應旬日增至數千。

起張嶺復爲南雄知府。

寧王宸濠奏討樂人秦榮爲樂官許之。

濠愛榮質美善唱于近侍奏討出入宮闈撥置府事。

改柴昇爲南京兵部尚書。

改李瀚爲南京戶部尚書。

三月流賊劉六劉七齊彥名等衆劫畿內州縣。

劉六等皆霸州文安人劉六等嘗因諸內官家人混入禁內至豹房縱觀上遊幸之所及爲都御史甯杲所逼遂聚衆拒捕劉瑾誅杲亦罷劉六等日倡獫不可制。

吏部尚書楊一清建言推用大將及文臣有才望者提督軍務。征勦畿內流賊劉六等從之。

內令有能擒斬盜賊三名者陞一級。

命惠安伯張偉克總兵官。召馬中錫爲右都御史提督軍務。統京營兵征流賊。

廷策會試中式舉人。賜楊慎余本鄒守益進士及第。許成名等一百十五名進士出身。趙官等二百三十一名同進士出身。

按餘冬序錄。宋太宗朝。呂蒙正李昉爲相。蒙正之弟蒙亨舉禮部高第。旣廷試。與昉子宗諤並以父兄在中書。罷之。仁宗朝。韓億爲參知政事。子維舉禮部。不與廷試。

受廕入官。宋制嚴於宰相子弟如此。惟秦檜柄國而子  
熺孫塤南省廷試皆冠多士。我朝景泰間大學士陳循  
王文子鄉試不第。訐訟考官特賜舉人。弘治乙丑科謝  
遷子丕至是廷和子慎其父引嫌不預讀卷其子並得  
及第。前此戊辰焦芳以子黃中不得狀元及第調降翰  
林諸執事官。故是科不得不爾。於此見我朝法制視宋  
爲稍寬而公卿典刑不逮宋人遠矣。

四月命太監張永同刑部尚書何鑑右都御史王鼎大理  
寺卿張綸審囚凡矜疑閔實者奏聞從末減釋之。  
修撰何瑋疏祛賊三事下部議之。

陞南雄知府張嶺爲江西右叅政。

大學士劉忠省墓遂乞致仕許之

時政權在張永大臣改事瑾者事永忠臨政持重同事者忌而擠之永令其黨廖鵬來謁遇以僕禮又却其餽忠畏叢內外怨在位不滿三月乞致仕同事者恐其得美名尼之強出爲會試主考官揭曉後卽乞省墓時費宏爲禮部尚書知貢舉將會試錄所刻文字指摘其疵謬以白紙票粘於文字之旁托中官入奏上召李東陽等至煖閣命太監張永以所進謄錄授之曰今欲別有施行恐壞衙門體面但與卿等知之耳東陽捧錄叩頭出是日適以省墓陛辭聞之抱快而去抵家遂具疏乞休上已有先入之說遂許之

命都指揮僉事楊完克總兵官鎮守四川地方。

起章懋爲南京禮部右侍郎乞致仕許之。

命叅將徐繼任劄松藩地方。

江西盜起命守制右都御史陳金總制江浙閩廣等處軍務率副總兵張勇討之。

先是贛賊犯新淦執叅政趙士賢靖安賊胡雪二等據越王嶺瑯瑤寨華林賊破瑞州府旣而撫州之東鄉饒州之桃源洞等處賊作亂。

五月兵部尚書王敞以人言改掌通政司事。

故事凡大政必下該部詳議覆奏然後行王敞在兵部遇盜熾束手無策俱吏部一清徑奏行之故科道劾敞。



不職乞速罷黜張永雖悅敵不能留

四川流賊藍廷瑞鄆本恕等殘害蓬劍二州勅總制尚書洪鍾同巡撫都御史林俊總兵楊宏相機勦捕以靖地方改何鑑爲兵部尚書提督團營

總制軍務右都御史陳金奏調廣西田州東蘭等狼兵共征江西巨賊從之

兵部尚書何鑑奏禦盜事宜從之

時承平日久人民不知兵郡縣望風奔潰甚至開門迎款以故南北不通人情洶洶鑑建議選將練兵嚴號令公賞罰募義勇起用逆瑾罷斥舊將都督白玉等數人奏行山東直隸等處修濬城隍選補軍餘機兵錄用民間

武勇。不許遺以資賊。鄉村鎮店。結伍立柵。互相應援。河  
南山西等處。設兵守黃河。斷大行。以防奔突。京操官軍。  
俱留本處分守郡縣。又於漕運十二把總部下。每船選  
精卒一人。沿河住劄。以防運道商旅。又請立大賞。以消  
大患。詔悉從所議。

勅巡視都御史高崇熙。鎮守太監肅興。同洪鍾林。俊會勦  
藍廷瑞。鄂本。恕。劇賊。

兵部尚書致仕劉大夏卒。贈太傅。諡忠宣。

大夏平生。不以勢位自居。爲叅政布政都御史。日遇事  
有當行者。未嘗先洩。事有疑難。心未明者。不以公文顯  
行。雖於屬官。亦具手簡直述其事。紙末必書名。以此士

大夫於公所委事無大小無不盡心竭力圖有成績期不相負人有言及勢要貪婪軍民有不得所者必蹙額不樂於所得爲者一一思以濟之吳廷舉嘗謂古人有言曰憂民如有病見客似無官大夏足以當之

六月總制尚書洪鍾巡撫四川都御史林俊陝西都御史藍章會兵討藍廷瑞鄆本恕等賊擒之加鍾太子少保陞俊右都御史章右副都御史

前後斬獲招降以十數萬擒其渠酋二十八人露布以聞

南京吏部右侍郎羅玘乞蚤定大計以絕窺覷不報玘言大盜並興迺布天下縛殺方面射死將官剖剥叅

將王杲執殺都御史馬炳然。或至擁如劉盆子者。二人馳騖中原。引誘不逞。自是二三大臣雖欲竊包荒養高之名。以庇其私門桃李之黨。如數年前。恐未可也。陛下尚欲與數十近習爲講武之舉。寧有暇哉。伏望立召親王。公侯駙馬。伯府部院寺大臣翰林科道多方考司。馬光范。鎮韓琦。文彥博。呂誨。包拯。趙抃之議。順昭穆之宜。而無卽真以俟前星之耀。

兵部尚書何鑑奏遣都督張俊。王琮。統兵分布霸州等處。流賊劉六等復回山東。

日本國遣寧波叛民宋素卿來貢。

七月。四川巡撫都御史林俊乞致仕。許之。

時宦者用事。每各邊征勦。必以其子弟私人寄名兵籍。冒報功陞賞。俊一切拒絕不許。權幸惡之。且與總制洪鍾議多不合。因乞致仕。疏上。忌者謂盜已衰。內批卽允之。此時蜀賊尚有餘黨。科道保留不從。俊歸。蜀人號哭追送。未幾而兩川連寇。方四任鬍子及麻六兒等復熾。殘破蜀地。人民亦遭荼毒矣。

文安生員趙璩降渠盜劉六劉七反。

璩有勇力。好任俠。劉六劉七齊彥名邢老虎率衆萬餘攻掠文安。璩偕家屬避賊立水中。賊刼其妻將汚之。璩怒奮往殺傷二賊。爲劉六劉七所擒。因降爲盜。

提督軍務右都御史馬中錫便服單車。從數僕直抵賊壘。

開其自新奏聞下廷議吏部尚書楊一清獨執不可赦從之

劉七屯兵近圻都御史馬中錫惠安伯張偉同征流賊所領京營人馬皆不閑習弓馬張又不知兵專主招撫請朝廷宥罪廷議將從之一清執不可曰中原百姓敢稱名煽亂罪在不赦宜易將增兵殄滅乃已

以喬宇爲南京禮部尚書

流賊劉六等知中錫招撫不從散而復合劫掠畿縣

先是惠安伯張偉都御史馬中錫二人受命征劉六等賊中錫書生欲効龔遂化渤海盜事招撫解散張偉統謗之子亦不知兵旣出兵中錫徧徼諸路凡劉六等經

過所在官司不許捕捉仍與飲食若聽撫待以不死劉  
六等聞之所至不殺掠然且信且疑中錫至德州桑兒  
園駐兵劉六等來謁中錫開城撫之劉六欲降劉七曰  
今內臣主國事馬都堂能自踐其言乎潛使人至京師  
探諸中貴無招降意又以山東所刼金銀輦載至京饋  
權倖求赦不得遂大肆刼掠衆至數萬中錫故城縣人  
賊至故城戒令勿焚刼馬都堂家中房屋財物由是謗  
騰謂中錫玩寇殃民

兵部尚書何鑑劾馬中錫張偉擁兵自衛縱賊不戰逮下  
獄論死

後中錫竟死獄中偉革爵閑住

詔都指揮桑玉受財啟禍通事王永與賊交皆下獄  
桑玉伏誅王永亦斃死于獄

八月大發兵討流賊命伏羌伯毛銳克總兵官太監谷大  
用總督軍務兵部侍郎陸完提督軍務

馬中錫等既無功中官因以爲此事非書生所能遂命  
谷大用總督令與陸完在臨清駐劄調宣府遊擊許泰  
卻永大同副總兵張復遊擊江彬各領邊兵入征內地  
俱聽谷大用陸完節制調遣

巨盜劉六劉七齊彥名領兵攻破棗強縣知縣段豸死之  
劉六等怒豸等抗拒屠戮人民不計其數

逆盜趙璠等推楊虎爲主帥攻破興濟縣又攻滄州不破



燒毀糧舡殺擄人民

吏部尚書楊一清疏急大本圖治安上不從

一清言陛下每月朔望之外視朝不過一二使遠近之民遂疑陛下不復念其窮苦四方盜賊亦謂陛下未嘗有意剪除不可聞於外夷不可訓於後世伏望早視朝收權綱以決壅蔽又言前星未耀龍輦嘗幸豹房日訓兵後苑非宮禁所宜恐無以安宗廟神靈伏望居禁密戒嬉遊以消意外之慮又言經筵講期甫臨輒聞報罷伏望仍舉行日講故事天下至樂無以逾此而百凡好尚皆不能奪之矣

遣巡撫山東都御史邊憲直定都御史蕭翀以遇賊失機

下獄除名爲民。

詔令州縣官被賊攻破城池比守邊將帥律抵死。  
流賊劉七等擁衆北向京師戒嚴。

上命兵部侍郎陸完提督軍務師已出涿州忽報賊在  
固安甚急。上召李東陽楊廷和梁儲至左順門問曰  
賊在東師乃西出恐緩不及事令兵部追還陸完令東  
出東陽等對曰甚當但恐官軍在北賊若南奔逸不可  
制。上曰張俊等皆在南料亦無害東陽復奏曰願朝  
廷賞罰嚴明諸將效力必有成功。上慰諭令退。  
提督軍務侍郎陸完合諸將大敗流賊于固安平口。賜  
羊酒。

初兵部調宣府副總兵許泰遊擊將軍郤永率部下入居庸關駐劄涿州延綏副總兵馮禎入紫荆關駐劄保定值賊圍滄州不克進抵霸州信安京師大震上御文華門召何鑑諭曰賊在近郊卿等將何處之鑑奏曰邊兵已到涿州賊來途死但恐望風遁去耳上喜諭曰若等就寫火牌調陸完徑往信安復諭曰朕直言直語卿等勿訝粗率鑑頓首謝承旨畢退至部中已秉燭矣遣人諭留正陽門鎖鑰賁牌到涿州戒以失誤者斬侍郎陸完欲領兵南行而賁牌適至遂直趨固安抵平口賊欲遁去諸將合兵蹙之賊大敗軍威遂振宣府副總兵許泰敗流賊于半壁店

宣府遊擊邵永敗流賊于鑑橋

延綏總兵馮禎遇賊于東明裴子巖率兵大敗之斬賊帥  
僞千戶

山東益都賊張興張旺等聚衆千餘在東平一路劫掠主  
事張嘉謨督續調官軍與遊擊邵永兵敗賊于高麗店盡  
殲之

以都御史張鳳巡撫山東甯杲巡撫保定

九月命刑部右侍郎戈瑄勘岷府不法事

總兵馮安帥官軍敗逆盜楊虎趙璩于景州朱門村璩等  
奔遁小灘河北

討敵五陣殺死賊一千餘人

保定都司田彬率指揮趙文等領官軍禦逆盜趙璵等敗績

九月初三日殺死官軍七千餘人拿住趙文次日釋放副總兵李瑾帥官軍禦逆盜趙璵等于山東蒙山地方敗績

殺官軍四十餘人棄鎗盔百餘副蟒衣一件楊虎將蟒衣沿途穿着璵過泰安縣題詩一首有縱橫六合誰敢捕之句

太監谷大用都御史陸完督遊擊許泰等帥官軍敗逆盜齊彥名等于裴子巖

殺死賊九百餘人去大名地方又被官軍殺死賊一千

餘人

南京吏部尚書張燦率部院尚書等官柴昇喬字李瀚劉  
纓孫需等請建儲宮不報

時儲位久虛盜賊紛起人心洶洶故言甚剴切

國子監祭酒石珪疏請擇宗藩親且賢者育宮中代行溫  
清烝嘗之禮不報

四川江津仁壽通賊方四住鬍子麻大兒等復起殘破蜀  
土命巡撫都御史高崇熙調兵討之

禮部尚書費宏奏鑄印局於食糧二名之外預處聽缺四  
人習字四人著爲令

鑄印局額設大使副使各一員食糧儒士二名及蒲將

補投考者不下數人。請托者半之。當事者每難於處分。故宏奏此擬數十年內。是投考及請託者皆絕。

倭寇浙東。

十月南京吏部侍郎羅玘再疏請早定大計。以繫屬人心。不報。

玘因前星未耀。南京部院請正儲位。不報。故又上言奸雄睥睨。人心搖兀。且侵及當國大臣。一無顧忌。

流賊劉七等破冀州。

大理寺卿張綸評高陽氏王豸非謀叛。罪止梟首。忤內臣魏彬等意。不從。

豸爲奸僧所啗。刺臂肉爲龍形。官校捕入東廠。坐謀叛。

欲侈功。綸不從。中官銜之。尋調工部右侍郎。

以右副都御史王縝巡撫應天等處。

南京兵部尚書柴昇上疏救時弊。收人心十三事。下部議行之。

大要祛逆瑾餘孽。中官不悅者滋衆。

巡撫河南都御史鄧璋因流賊南劫。奏留懷慶知府臧鳳得民詔。改河南左叅政督理糧儲。

鳳陞山西左叅政。故璋奏留之。

以燕忠爲大理寺卿。

擢山東樂陵知縣許達爲山東按察司僉事。備兵於武定州。



達河南固始人由進士令樂陵期月令行禁止時流賊  
勢熾達預築城濬隍貧富均役踰月而成又使民各築  
墻高過屋簷仍開墻竇如圭僅可容一人家令一壯丁  
執刃俟于竇內其餘人皆入隊伍令日守吾號令視吾  
旗鼓違者軍法從事又設伏巷中洞開城門未幾賊果  
至旗舉伏發賊火無所施兵無所加盡擒斬之自是賊  
不敢近樂陵城撫按交薦其才遂超擢是職

逆盜趙璠等攻破靈山等衛日照等縣

南至徐州攻城未破

寧王宸濠塋母於西山青嵐

先朝禁革舊穴

寧王宸濠指收祿米遺例每石折銀二兩。過限倍徵。十一月。少傅兼太子太傅吏部尚書武英殿大學士劉忠因省墓在家。乞致仕。從之。

逆盜趙璚等至宿遷縣。殺死高郵等衛官軍三百餘人。執高郵指揮陳朋隨行。

靈壁知縣陳伯安領兵禦逆盜趙璚。敗績。被執。往攻宿州。城不破。燒毀南關。

殺死官軍二百餘人。尋釋伯安。去攻破虹縣永城夏邑虞城等縣。放火殺人。又執虞城知縣。尋又釋之。又攻破歸德州。

武平衛致仕指揮石

領官軍僧兵。禦逆盜趙璚等。敗

績。殺死僧兵七十餘人。

逆盜楊虎等溺死。趙璵等復推劉惠爲僞帥。

潁州夏指揮等率官軍扼小黃河渡。楊虎領黃寧等七人奔一舟欲濟。官軍覆其舟。虎等俱水死。

總兵白玉領官軍禦逆盜劉惠於泰和縣小南門。敗績。殺官軍一千五百餘人。奪盔甲鎗刀二千餘件。神器七十餘件。

逆盜劉惠攻破沈丘鹿邑。

執都司潘翀。殺都司王保。射傷河南布政司經歷任傑。軍民死者一千餘人。

新蔡縣致仕知府張釋同生員老人等備馬匹金帛赴鹿

邑哀免一縣生靈惠等不攻去之

京師地震

魯府鄒平王當襲爵爲庶兄奪且數年。禮部尚書費宏因奏辨據倫序謂宜改正。下廷臣議從之。

流賊劉六等攻徐州掠淮西

流賊劉七等覘知谷大用毛銳等官軍在臨清擁衆復奔

霸州

賊以十二月朔車駕出郊宮省牲圖犯御蹕時兵部尚書何鑑未寢左右無一吏卒乃自具帖子令家奴遞入長安門就託守門中官姓名逐門遞入司禮監直房轉奉 上知復寫牌傳各衙門嚴加防守又緹城賫報通

州良鄉涿州各守備官。整備人馬。兼以常制。駕出南郊。分調軍馬於南海子。蘆溝橋。牟房角。三處下營。以防衝突。處分以定。漏下五鼓矣。頃之。上命司禮監太監召至左順門。問今日駕可出否。對曰。駕當早出。以安人心。車駕遂出。迨暮方回。賊知有備。遂西奔。掠新城。雄縣。定興。安肅。易州。涞水而南。破高陽。蠡縣。博野。容城。深澤。東鹿。覘知祁州備禦有方。乃迂道徑攻臨城。高邑。成安。饒陽。由真定掠趙州。安平。直抵晉州。藁城。栢鄉。內丘。南和。衡水等處。鑑計賊非東向臨清。必南奔彰德。移文促陸完督軍分道追襲。至彰德。賊方圍湯陰。聞官軍至。望風遁去。許泰。馮禎。邵永。金輔。李瑾。張俊。成釗。追

戰敗之渡河陷溺死者無算。

逆盜劉七等復糾衆萬餘圍李瑾馬禎營。許泰與禎瑾內  
外夾攻敗之賊遁去。

紀功給事中柴玉吳榮御史吳堂雷宗建議請乘屢捷機  
會速加陞賞以勵人心。詔陞賞諸將有差。

十二月逆盜劉六劉七齊彥名等分爲一夥寇山東劉惠  
趙琢邢老虎分爲一夥寇河南。

賊欲牽制官軍故分寇其勢益熾。

逆盜劉惠僞號奉天征討大元帥趙琢僞號副元帥。

餘盜僞授都督提調協守指揮千百戶等名分作東西  
二廠管事分爲二十八營以應二十八宿又置金旗一

對上書虎賁三千直抵幽燕之地龍飛九五重開混  
沌之天又僞造鈞牌上書大元帥劉副元帥趙仰前途官  
吏整備草鋪合用器物修理橋梁道路迎接者秋毫無  
犯迎敵者寸草不留違悞者軍法從事

逆盜劉惠等攻陷上蔡縣

上蔡知縣霍瑄率典史併信陽指揮督兵拒守逆盜劉  
惠等破城將霍知縣支解梟掛燒劫官民房物庫獄無  
遺賊前到商水知縣率師生迎入察院住劄數日

西平知縣王佐率兵拒敵不支賊劉惠等支解之

盜乘勢攻破遂平舞陽葉縣殺死陶知縣妻馮氏及知  
縣唐天恩拜父唐正凡六人

舞陽縣監犯僧德靜妄稱唐府逐出有孕宮人所生逆盜賈免兒留在營內

逆盜趙璩等攻邾縣將破城內送出馬二十八匹遂不殺人引衆去之

逆盜趙璩等攻破寶豐縣僉事孫差陰陽生賁執招撫黃榜來營璩等寫乞恩辨明本一副與陰陽生賁回

內開先年羣奸在朝舞弄神器濁亂海內誅斬諫臣屏斥元老未有不亡其國者乞皇上澡雪精神獨斷于

中梟羣奸之首以謝天下斬臣之首以謝羣奸等語

逆盜趙璩等攻破裕州殺死都司詹濟同知郁采御史任遂屠其城



殺死男婦數千。官民房屋燒劫一空。隨有唐府差人說德靜非我骨肉。可與殺之。

命遼東巡撫都御史彭澤與咸寧伯仇鉞提督軍務。節制寧夏延綏諸路軍馬。討河南流賊。

河南親藩及守臣告急。兵部尚書何鑑建議復於宣府許泰邵永大同李鉉遼東劉暉延綏時源馮禎諸將部下續調未發官軍各若干。分道赴之。復以諸賊分責諸將。計日勦滅。

以禮部尚書賈宏兼文淵閣大學士。內閣辦事。

加吏部尚書楊一清少保兼太子太保。

命都御史叢蘭巡撫廬鳳滁和等處。兼賑濟丘荒。

詔贈裕州同知郁采光祿寺少卿廕一千。

時被賊殺死西平知縣王佐舉強知縣段彖上蔡知縣霍瑄俱贈官賜廕。

逆盜趙璵攻鉤州不克以尚書馬文升家在園中引衆去之。